

Nunalerinermik inuussutissarsiornerup siuarsarneqarnissaa pillugu Inatsisartut inatsisaannut oqaaseqaatit

### **Nalinginnaasumik oqaaseqaatit**

#### 1. Aallaqqaasiut:

Nunalerinermi inuussutissarsiutinut tapersiisarnermi malittarisassat maannakkut atuuttut, Aalisarnermut, piniarnermut nunalerinermullu tapersiisarneq pillugu Inatsisartut peqqussutaanni nr. 10, 12. november 2001-imeersumi aaliangersarneqarput, Aalisarnermut, piniarnermut nunalerinermullu tapersiisarneq pillugu Inatsisartut peqqussutaanni nr. 11, 20. november 2006 – imeersumi allangortinneqarlutik. (Akiligassallit nikinnerat, attartukkanik taarsersuineq kiisalu aalisarnermut, piniarnermullu tapersiisarneq pillugu malittarisassat atorunnaarsinneqarlutik).

Nunalerinermik inuussutissarsiornerup siuarsarneqarnissaa pillugu, Inatsisartut Inatsisissaattut siunnersuutip matuma, Inatsisartut peqqussutaat qulaani taakkartorneqartoq taarserpaa.

Siunnersuummi pingaarnertut anguniarneqartut tassaapput inatsisip ullumikkut naleqqussarlugu nutarterneqarnissaa, tassunga ilanngullugit, nalunaarutitigut malittarisassanik aaqqiinikkut ammaassinerit arlaqartut, eqaallisaaanermi attartortitseriaatsimik nutaamik piuminarsakkamik atuutsilersitsineq, sumiginnaanermilu periusissatut periarfissat ikilisarneqarnissaat, inatsisartut inatsisaannik piuminarsaaneq aamma Inatsisartut inatsisaannik paasiuminarsaaneq atoruminarsaaneq. Taamatuttaaq Naalakkersuisut, peqqussummut maannamut atuuttumut naleqqiullugu, nunalerinermik inuussutissarsiuteqartut atugaasa ajornerulinnginnissaat pingaartippaat.

Inuussutissarsiutitigut siuarsaaneq pillugu 2006–imi, Inatsisartut peqqussutissaannut siunnersuutip suliarinerani, nunalerinermut tunngasortaa peerneqarpoq, nunalerinermik inuussutissarsiuteqartut aammalu Inatsisartut, kinguartitsinissaq piumasaqaatigimmassuk, taamaasilluni nunalerinermut politikki pillugu nalunaarusiaq suliarineqarniassamat. Suliassaq tamanna UPA 2007–imi naammassineqarpoq, nunalerinermik inuussutissarsiuteqarnermi aningaasaqarniarnerup misissuiffigeqqissaarneranik malitseqartumik, taannalu UPA

2008–mi, Inatsisartunut saqqummiunneqarluni. UKA 2007-imi aamma UPA 2008–mi, nunalerinerup tungaatigut assigiinngitsunik suliniutissanik kissaateqartoqarpoq.

Nunalerinermik politikkip, aningaasaqarniarnerullu misissuiffigeqqissaarnerani kiisalu pineqartutigut inuussutissarsiuteqartut saqqummiussaata aallaavigalugit paasinarsisippaa, nunalerinermik inuussutissarsiuteqarnerup ilusaata, piffissaq aggersoq ungasinnerusorlu isigalugit, naleqqussarneqarnissaa annertuumik pisariaqartinneqartoq, aningaasaqarnikkut imminut nappannissamik takorluugaqarneq piviusunnngussappat, aammalu Kalaallit Nunaanni nunaateqarnermik inuussutissarsiuteqarnerup piorsarneqarnissaa annertusarneqarnissaalu attatiinneqassappata.

## 2. Siunnersuummi pingaarnert:

Nunalerinermik inuussutissarsiutinut tapersiisarnermik periarfissiinikkut ammaassinissamik siunnersuummi matumani siunertaavoq. Inatsisissatut siunnersuutip sianigaa nunaateqarnermut tapersiisarnerup ataavartumik naammassisaqarfiunissaa, imminullu akilersinnaanera isiginiarneqartuassasoq.

Siunnersuummi tapersiisarnermi aningaasaliissutit atuuttuusut tunngaviatigut allangortinniarneqanngillat. Taamaattorli siunnersuutip siunnerfigivaa tapersiisarnermi aningaasaliissutit taarsigassarsititsinertut annerpaamik ator-neqassasut.

Inatsisartut peqqussutaanni atuuttumi, attartukkat ernialersukkat, erniaqanngitsunik akilersugassaangitsunillu taarsigassarsineq kiisalu nammineq aallaqqaasiineq atuupput. Allaffissornermi suliassat oqilisarniarlugit, siunissamut sammisunik attartoriaatsinik marlunnik pilersitsisoqassasoq sullisigineqarpoq, taakkulu taaneqarput inuussutissarsiutip siuarsarneqarnissaa pillugu attartortitsineq aamma ingerlatsinermut akiligassarsiatut taarsigassarsineq. Attartoriaaseq ingerlatsinermut akiligassarsiatut taasaq ersarinnerusumik siunnersuummi § 17-imi oqaseqaatitigut nassuiarneqarpoq.

Attartortup attartukkaminik apparsaanera ilutigalugu, attartukkat appartinnerinut Naalakkersuisut tapersiinissaat siunnersuutigineqarpoq. Tassa imaappoq attartortup akilersugaanut naleqqiullugu, akiitsut ikilisinneqassapput, tassaniipporlu tunngaviummik tapersiisarneq. Attartortoq aatsaat tapersiiffigineqarsinnaavoq, attartukkaminik akilersuiguni. Tamanna naatsorsuutigineqarpoq, attartortup isumaqatigiissutit malillugit attartukkaminik akilersuinissaanut kammattuutaaneranik kinguneqassasoq.

Inatsisartut peqqussutaanni atuuttumi, attartornermi siunertanut ataasiakkaanut, procentikkaartumik annertussusilersuisoqarpoq, tamatumani erniaqanngitsunik akilersugassaangitsunillu taarsigassarsineq, ernialersukkanik attartorneq aammalu nammineq aallaqqaasiutissatut pigeriigassat qanoq amerlatigissanersut aaliangersarneqarlutik. Tamatuma allangortinneqarnissaa siunnersuutigineqarpoq,

taamaasilluni inatsit nutaaq aallaavigalugu taarsigassarsianut tapersiissutit annertussusaat nalunaarusiornikkut aalajangersarneqassallutik.

Peqqussummut atuuttumut sanilliullugu suusupaginnittoqarnerani Naalakkersuisut iliuusissatut periuserisinnaasaat assigiinngitsut killilerneqarput. Tamanna, tapersiisarnermik aqqissuussinerup siunertaata marloqiusaanageranik siunertaqarnermik aallaaveqarpoq, tassaallutik inuussutissarsiornermi siunniussatut kissaatigisamut taarsigassarsineq kiisalu akilersuilluni utertitsinermi tapiissutit uterteqqinneqartarneri. Taarsigassarsinermi atugassarititaasut pitsaasut iluanni tapersiisarnermut tunngassutillit ilaareersutut naatsorsuutigineqarput, taamaasillunilu taarsigassarsisup, taarsigassarsinermi isumaqatigiissut malillugu, aningaasaliissutigineqartunik utertitsinissaanut periarfissai pitsaasumik tunngavissinneqarput. Tamanna aallaavigaanni maannamut inatsisartut peqqussutaanni atuuttumut akiliisitsinngikkallarnissamut aamma isumakkeerinninnissamut periarfissanut amerlasuunut naapertuutinngilaq. Taamaammat piffissaq aalajangersimasoq naapertorlugu akilersuisarnerup kinguartinnissaanut periarfissat ikilisarneqarnissaat siunnersuutigineqarpoq.

Tamatumunnga ilaavortaaq Inatsisartut inatsisaata paasiuminarsarneqarnissaa, taamaasillunilu atorluarneqarnissaata kissaatigineqarnera, soorlu iliuusissatut periuserisinnaasat kiisalu malittarisassat immikkuullarissut ikilisarneqarnerisigut.

Inatsisartut peqqussutaanni atuuttumi aaliangersakkat atoqqittussatut siunnersuutigineqanngitsut ilallugit ilaatigut suusupaginnittoqartillugu, pillaammik ernialiisinnaatitsinermut periarfissaq, taarsigassarsisup taarsiisinnaanageranut taarseerusussusaanullu tamatuma sunniuteqarsimannginnera tunngavilersuutigalugu. Tamatumanissaaq, taarsigassarsisumut, akileerusunngitsumut akiliisinnaanngitsumullu, artukkiisumik, 10 %-imik pillaammik erniaaliisitsisarneq, Inatsisartut inatsisaata siunertaanut naapertuutinngilaq.

Siunnersuummi siunnersuutigineqarpoq, ukiut marluk tungaannut inuussutissarsiutit siuarsarniarlugit attartukkanut akilersuutinik kinguartitsisoqarsinnaasoq, immikkuullarissumillu pisoqarpat siviuserusumik kinguartitsisoqarsinnaasoq. Taarsigassarsinermi isumaqatigiissut suli eqqortinneqarsinnaanngippat, periarfissaq tassatuaassaaq taarsigassarsianik atorunnaarsitsineq, qularnaveeqqutaasinnaasullu tuniniarnissaat siunertaralugu tigusineq.

Peqqussummi atuuttumi § 14, imm. 2-mi savaateqarfinnik nutaatut pilersitsinermi taarsigassarsisitsisoqassanngitsaq, taassuma ilaateqqinneqarnissaa siunnersuutigineqanngilaq. Matumani savaateqarfinnik nutaanik pilersitsoqarnissaanut ammaassissoqarnissaa siunertarineqanngilaq. Siunnersuummi, aningaasaliissutit amerlassusaat, imaluunniit aaliangersakkani siunniussat taamatut iliornissamut ammaassisinnaanngillat. Tamatumunnga tunngaviorpiarpoq savaateqarfinnut pioreersunut, aningaasaqarniarnikkut imminut akilersinnaasumik ingerlatsinissaaq ajornakusoorsimammat. Taamaammat aalajangersagaq pisariaqanngitsutut isigineqarpoq.

Taamatutaaq siunnersuummi, taarsigassarsititsiniartarfinni allani taarsigassarsianut erniatigut tapiissuteqarsinnaasarneq atoqqittussaatinneqanngilaq.

### 3. Aningaasaqarnermi allaffissornermilu pisortanut kinguneri:

Aningaasaqarnermi aammalu allaffissornermi pisortanut kinguneri allannguuteqarnaviangillat, matumanimi siusinnerusukkut aningasanut inatsisaasuni, aningaasaliissutitut sinaakkusiussat allannguuteqanngimmata. Siunnersuummi, inatsisitigut allaffissornermut tunngasutigut piuminarsaanissat siunniunneqarput. Ingerlatsinermi akiitsutigut aningaasaliiffigineqarneq atortuulersinneqarpoq, pingaarnerusumik allaffissorneq oqilisaaffiginiarlugu, taamaasilluni qinnuteqaateerapassuit matumani isummerfigineqartariaarutissapput, taamaattorli pineqarpoq, ingerlatsinermi taarsigassarsiat aqqutigalugit aningaasaliiffigineqartarnissaat.

Inuussutissarsiutitigut siuarsaanermut taarsigassarsianut imaluunniit tapiissutinut qinnuteqaatit amerlinissaat naatsorsuutigineqanngilaq.

### 4. Aningaasaqarnermi allaffissornermilu inuussutissarsiornermut kinguneri:

Siunnersuut inuussutissarsiornermut aningaasaqarnikkut aamma allaffissornermi annertuumik kinguneqartussatut nalilerneqanngilaq, taasariaqarporli inuussutissarsiutit siuarsarniarlugit taarsigassarsisimasut ilaasa, piffissaq taarsersuiffissaat ajornerulersillugit allannguuteqartinneqarmata. Ilanngullugulu oqaatigisariaqarpoq siunnersuutigineqarmat aamma nunalerinermit atatillugu, annertuumik iluarsaassinernut taamaallaat inuussutissarsiutit siuarsarniarlugit taarsigassarsisoqarsinnaanera siunnersuutaammat, siusinnerusumut naleqqiullugu iluarsaassinernut tamakkiisumik naliginnaasumik periarfissiisoqartarsimagaluarmat.

Tamatuma saniatigut, pisinermi pisisarfinnut assartuisartunullu utaqqiisaagallartumik akiliinissamut qulanaveeqqusiisoqarsinnaajunnaarpoq. Tassunga paarlaallugu ingerlatsinermi akiitsutigut aningaasaliiffigineqarsinnaaneq periarfissaavoq.

Peqqussummut atuuttumut naleqqiullugu allannguutit nunalerinermit ingerlataqartunut ataasiakkaanut atatillugu ajornerulersitsinermit kinguneqassangatinneqanngilaq.

### 5. Avatangiisinut pinngortitamullu kinguneri:

Inatsisissatut siunnersuut avatangiisinut pinngortitamullu kinguneqassanngilaq. Taamaattorli § 9, imm. 1, nr. 2 naapertorlugu periarfissiisoqarpoq innaallagissiornermut atortunik sananermut pissarsinermulluunniit, tassunga ilanngullugit erngup nukinganik innaallagissiorfeeqqat, anorisaatit aamma seqerngup qinngorneranit nukissiuutit nunalerinermit siunertamut, illuutinut aamma illumut

qimatamut pissarsinermut. Siunertanut taamatut ittunut tunngaviupput mi-  
ngutsitsinngitsumik ataavartumik nukissiuuteqartitsineq, aammalu CO2-mik  
annikillisaanermut siunertaqartuusutut.

#### 6. Allaffissornermi innuttaasunut kinguneri:

Siunnersuut allaffissornermi innuttaasunut kinguneqassangatinneqanngilaq.

#### 7. Naalagaaffeqatigiinnermut namminersornermullu tunngassutillit:

Siunnersuut Naalagaaffeqatigiinnermut Namminersornermullu annertunerusumik  
kinguneqassangatinneqanngilaq.

#### 8. Oqartussaasunik kattuffinnillu tusarniaaneq:

Siunnersuut manna tusarniaassutigineqarpoq ulloq 08. april 2009  
akissuteqarnissamut killissarititaq ullormut 15. juli 2009-mut tigusassanngorlugu.  
Ukualu tusarniaanermut ilaatinneqarsimapput; Kalaallit Nunaanni Kommuneqarfiit  
Kattuffiat (KANUKOKA), Savaatillit Peqatigiit Suleqatigiissut (SPS),  
Konsulenttjenesten for Landbrug, Grønlands Arbejdsgiverforening (GA),  
Nunaqavissut Sulisitsisut Kattuffiat (NUSUKA) aamma Sulinermik  
Inuutissarsiuteqartut Kattuffiat (SIK).

Tusarniaanermi piffissaq killigitaasup qaangiunnerani oqaaseqaatinik  
Inuussutissarsiordermut aamma Suliffissaqartitsinermut Naalackersuisoqarfimmit  
(matuma kingorna ISN) aamma ataatsimoorussamik tusarniaanermut  
akissuteqaammik Nunaateqarnermut Siunnersuisoqatigiinnit aamma SPS-ip  
siulersuisuinit tigusisoqarpoq.

Inatsisissamut siunnersuummut tusarniaanermut atatillugu siunnersuutit tiguneqartut  
ilai siunnersuummut ilanngullugit Naalackersuisoqarfiup suliarivai. Taamatuma  
saniatigut Naalackersuisoqarfiup nalunaarutigissavaa tusarniaanermi sammisat  
piviusut tiguneqartut ataani saqqummiummagit. Naalackersuisoqarfiup  
tusarniaanermut akissutinut oqaaseqaatini allaatsimik equngasumik ilisarnaaserlugu  
(kursiv) akissuteqaatigai.

ISN tusarniaanermut akissummini imatut oqaaseqarpoq ”ISN-ip  
aallaqqaasiutigalugu Aalisarnermut Piniarnermut Nunalerinermullu  
Naalackersuisoqarfik (APNN) nersuaalarumavaa Inatsisartut peqqussutissaat  
paasiuminarlisaavigimmagu aamma qulaajaruminarsaavigimmagu aammalu  
taarsigassarsititsinerit assigiinngitsut pisariillisaavigimmagit.”  
Inuussutissarsiuteqarnermut Naalackersuisoqarfik tamatuma kingorna allapportaaq  
”ISN-ip APNN isumaqatigilluinnarpaa taarsigassarsititsineq  
inuussutissarsiuteqarnermut siuarsaataasinnaaneranik tunngaveqartitsimmat aamma

isumaqatigalugu taarsigassarsititsisinnaanerit assigiinngitsillugit pitsaanerulluartumik siunertaliititsimmat. Soorlu APNN-ip nalunngikkaa, ISN inuussutissarsiornerup siuarsarneqarnissaanut taarsigassarsititsisarnermik periarfissiisarpoq”.

ISN tamatuma kingorna APNN-imut apeqquteqarpoq inuussutissarsiornerup siuarsarneqarnissaanut taaguusiinermi oqariartuummut naapertuuttumik saqqummiussaqaarsinnaannginnersoq. Siunnersuut tamanna peqqutilersorneqarpoq Namminersornerusut inuussutissarsiornerup siuarsarneqarnissaanut arlaqartunut taaguuteqartitsimmat.

ISN-imittaaq APNN-imut siunnersuutigineqarpoq APNN-ip ataqatigiissaarinissamut periarfissanik ujartuissasoq APNN-ip aamma ISN-ip tapersiillutik taarsigassarsititsisinnaanerinit atatillugu. Tamatumunnga ISN isumaqarpoq qeqqussanut, uillunut aamma kuanninut tunisassiornermut inuussutissarsiornermut ingerlassaqartuusunut immikkut naleqquttusoq.

ISN erseqqissaavoq tapersiisarnernik taarsigassarsititsisarnernut allaffissornermut ISN nammineq misilittagaqareerluni taamaammallu inatsisissatut siunnersuummi § 5-imi nalilersuutit immikkut soqutiginaateqartillugit. ISN tamatuma kingorna allappoq ISN isumaqarluni suliamik suliaqarnermut periusissanik pilersitsinermi tulluurtuussasoq, suleriesissanik taarsigassarsititsinerup annertussusaanik qaffasinnerpaaffiliinissaq aamma/imaluunniit piffissamik sivisunerpaaffiliinissaq taarsigassarsiat utertillugit akilersorneqarnissaanut pilersaarummut atatillugu.

Ilutigitillugu APNN piumaffigineqarpoq qinnuteqartoq piumaffigineqassasoq aningaasat tunniunneqartut sumut atorneqarsimaneranik nalunaarusiornissaanik. ISN-ip isumaa naapertorlugu piumasaqaat tamanna tapiissutinut aningaasaliissuteqarnernut attuumatinneqartariaqarpoq. Siunnersuut tunngavilersorneqarpoq taamaasiornikkut pineqartumut ineriartortitsisarnermik malinnaatinneqarsinnaaneq ammaassivigineqassammat aammalu tapersiisarnernut taakkununnga ilisimasaqarnerulernissaq.

ISN-ittaaq siunnersuuteqarluni paragraffit arlaqartut paragraffimut ataatsimut katiterlugit suliarineqarsinnaaneramik, taamaasilluni attartorsinnaanermut periarfissat aamma tapiissuteqarsinnaanermut periarfissat immikkoortillugit ataatsimut katiterneqaqullugit.

*Aallaqqaasiutigalugu nalunaarutigineqassaaq APNN-ip nalilermagit ISN-ip akissuteqaatai kinguneqartumik isumaliortitsilluarmata aamma naleqarluartuullutik.*

*Aammattaaq APNN nalunaaruteqassaaq ISN-imut isumaqataalluinnarluni inuussutissarsiornerup siuarsarneqarnissaanut attartortitsisarnermik taaguusiineq erseqqarinnerusumik taaguuserneqarsinnaaneramik. APNN-ili ima inissisimavoq isumaqarlunilu taamatut allannguuteqartitsinissaq paatsiveerusimaarnermik aamma ilimanaateqartumik nunaateqartunut ataasiakkaanut qulartitsisinnaaneramik kinguneqarsinnaasumik pilersitsisinnaammat. Nunaateqartut taakku taaguutsimut tamatumunnga ilikkarsimalereerput, taamaammallu imaassinnaavoq APNN*

*massakkumut naleqqiullugu tamanna siunissami suliaqarfimmut nalunaarusiornermut atatillugu atuutsitsilernerme ersarinnerusunngorlugu suliaqartoqarnissaa orniginerullugu.*

*ISN-ip APNN-imut tapiissuteqartarnermut ISN-ip ataani periarfissaasunut ataqatigiissaarinissaanut kajumissaarineranut atatillugu, APNN nalunaaruteqassaaq siunnersuummut pitsaasumik isumaqataalluni. APNN-illi siunnersuut tamanna pillugu qanoq ittunik suleriusissanik isumaliuuteqarumavoq.*

*APNN-ittaaq suliat pisariillisarneqarsinnaanerannut suleriusissatut atorneqarsinnaasutut siunnersuutit, soorlu attartortitsinerup annertussusaata qaffasinnerpaaffilernissaa, utertillugit taarsersuinissamut piffissap sivirususilernissaanut killiliinissaq aammalu nalunaarusiortarnissamut piumasagaatit ilassilluarpai. Tassungali atatillugu suleriaasissanut periusissat pitsaanerpaat aallartisarneqarnissaanut nalilersueqqittoqaqqaartariaqarluni.*

*Naggataatigullu APNN-ip nalunaarutigisinnaavaa paragraffit tulleriinnilersorneri allannguuteqartitsivigisimammagit. Siunnersuummi tapiissutinut aamma taarsigassarsititsinermut periarfissanut atatillugu taamaammat immikkut ataatsimoortillugit suliarineqarput.*

Nunalerinermut siunnersuisoqatigiit aamma nunaateqarnermut siunnersuisoqarfiup ataatsimoorussamik tusarniaanermut akissuteqaateqarnermikkut inatsisissamut siunnersuummut sammisat tulleriisillugit uku oqaaseqaateqarfigivaat:

Isumasiuutit, taarsigassarsititsisinnaanermut ukioqqortussuseqarnermut killiliinerit, innaallagissamut pilersuisinnaanermut pissarsinerit, aningaaserivinnut attartorsinnaanermut qularnaveeqqusiinerit, nunalerinermit tunisassiassanut nutaanut pilersitsiniarnermut aningaasalersuinissamut atugassanik Namminersorlutik Oqartussat saniatigut qularnaveeqqusiinnaanerit, piginnittut paarlaannerat aamma kinguaariit nikinnerat, inuussutissarsiummut maskiinat namminerisamik ingerlasinnaasut aningaaserivinnit aningaasalersorneqarnissaannut tapiissutit, aammalu taarsigassarsisinnaanermut aamma tapiissutinut arlalinnut agguaassinissamut sinaakkutissat.

*Naalackersuisoqarfiup siunnersuutit misissornerini aalajangerpoq, nunalerinerup iluani aaqqissuusseqqinneq marloqiusanngorlugu matumani inatsisitigut aaqqiivigerusullugu. Aalajangerneq tusarniaanerup akissuteqaasiorfigineqarneranit annertuujusup tunuliaqutarivaa, akissutaasullu suliarineqassappata aamma siunnersuummut ilanngullugilluunniit suliarineqassagaluarpata tamanna UKA 2009-mi suliarineqarnissaanut sioqqullugu pisinnaassanngimmat.*

*Nunalerinermik inuussutissarsiornerup siuarsarneqarnissaa pillugu inatsisissamut siunnersuummut matumunnga tusarniaanerup akissuteqaateqarfigineranit siunnersuutit ilaat ilanngunneqarput, siunnersuutaasulli sinneri kingusinnerusukkut allanngortitsinissamut atatillugu suliaralugit ilanngukkumaarlugit.*

*Inatsisissamut siunnersuummut matumunnga Naalakkersuisoqarfiup inatsisissamut siunnersuummut siunnersuutaasut taamaasilluni ilanngullugit suliarivai.*

*Ataatsimoorussamik siunnersuuteqartut siunnersuutigivaat § 2-mi aalajangersagaq silinninngortinneqassasoq, taamaasillutik "Nunaateqarneq" aamma "Nunaateqarnermik inuussutissarsiuteqarneq"-mut ilanngussisoqassasoq, tamannalu isumagineqarpoq.*

*Tamatuma saniatigut ataatsimoorussamik akissuteqaateqartut tusarniarneqarnerminni akissuteqaamminni allapput, ukioqqortussutsip killilerneqarnera 18-iniit 60-inut ukioqarneq allanngorteqqullugu 21-iniit 65-inut ukioqarnermut killilerneqassasoq. Tamanna peqquilersorneqarpoq nunaateqarnermik ingerlassaqarnermi inerisimalluarnermik aamma ilinniagaqarluarnermik pisariaqartitsinera aammalu kalaallit nunaateqartuusut ingerlatsinerminnik tamatigut ukioqqortussusaat 60'ikkut naggataanni aatsaat unisitsisoqartarmat. Ataatsimoorussamik siunnersuuteqartut siunnersuutaat akueralugu siunnersuummi § 12-imi ilanngunneqarpoq.*

*Ataatsimoorussamik akissuteqaateqartut siunnersuuteqarputaaq inatsisissamut siunnersuummut atatillugu, siunnersuut inuussutissarsiornermut tapersiinnikkut ataavartumik nukissiuutit atorlugit, soorlu nukissiorfeeqqat seqerngup qinngorneranit, anorimit aamma erngup nukinganit pisut pilersinneqarneranni pissarsiarineqarnerannilluunnit periarfissaqartariaqaraluartoq. Piumasaqaat tamanna siunnersuummi akueralugu § 9, nr. 2-mi ilanngunneqarpoq.*

*Tulliuttuni inatsisissamut siunnersuummut matumunnga siunnersuutigineqaraluartut ilanngunneqanngillat.*

*Ataatsimoorussamik akissuteqaateqartut tusarniaanermut akissuteqaateqarnermikku siunnersuuteqarput aningaasalersuisinnaanermut tunngasumik innaallagiussiorfeeqqanut qulaani taaneqartunut ataavartumik nukissiuutit atorlugit inuussutissarsiutinut tapersiisarneq 150.000 kr.-inut killilerneqassasoq aammalu atortut pineqartut assinginut 500.000 kr.-it angullugit attartornissamut qularnaveeq-qusiinernut periarfissaqarnissamut kissaateqarlutik, taakkunannga 150.000 kr.-it inuussutissarsiutit siuarsarneqarnerannut attartukkanit aningaasalersorneqassallutik sinneruttullu 350.000 kr.-it pisortat qularnaveeqqusiinerisigut namminerisamik aningaasanik attartornikkut pisalluni.*

*Ataatsimoorussamik akissuteqaateqartut attartornissamut qularnaveeqqusiinernut periarfissaqarnissamut kissaataannut atatillugu akissuteqaateqartut apeqqutinut ukununnga siunertaqarluarnerannik tunngavilersuuteqarput:*

- 1. Nunalerinermi tunisassianut nutaanut namminerisamik ingerlasinnaalernissamut aningaasalersuinissamik qulakkeerutaassammata.*
- 2. Piginnittut nikerinneranni aamma kinguaariit paarlaasseqatigiinnerini taarsigassarsisitsinerit aamma*



3. Atortut namminerisamik ingerlasinnaasunut aningaaserivitsigut aningaasalersorneqarnissaannut tapiissuteqarnermut atatillugu

*Qulaani taaneqareersutut Aalisarnermut, Piniarnermut Nunalerinermullu Naalackersuisoqarfiup siunnersuutit aningaasatigut kingunissai pillugit ersarinnerusumik nalilersuisoqaqqaartariaqartoq aamma suliarilluarneqartariaqarlutik taakkua pillugit Naalackersuisut Inatsisartut inatsisissaannut siunnersuuteqalinnginnissami qulaajaqqaarumammatigik.*

*Inatsisissamut siunnersuummi aaliangersakkanut ataasiakkaanut oqaaseqaatit*

### *§ 1- imut*

Imm. 1 aamma 2

Inatsisissatut siunnersuummi pineqarput inuussutissarsiutit siuarsarniarlugit taarsigassarsititsisarneq aamma tapiissuteqartarneq.

Peqqussummut maannamut atuuttumut naleqqiullugu, siunnersuutigineqartumi nutaami siunertaq tunngaviosorlu tassaavoq, siammasissumik isigalugu, nunalerinermi inuussutissarsiutinik piorsaanermi Kalaallit Nunaannut nammineq pilersuisinnaanermut pilliuteqarneq, aamma suliaasaqartitsinerup siuarsarneqarnissaa pillugu.

Inatsisissatut siunnersuummi, inuussutissarsiummik pitsaasumik ingerlatsilluni unammillerluarsinnaanermi, piffissaq ungasinnerusoq isigalugu suliaasaqartitsiffiunera taputartuunneqarmat, piffissaq ungasinnerusoq isigalugu suliaasaqartitsiniarneq, inuussutissarsiummut, tapersiissuteqarneq pissutigalugu unammillernermut kiputtoorutaassanngitsoq kissaatigineqarpoq. Taamaasilluni kissaatigineqarpoq, suliniutissanik, kingusinnerusukkut imminut nappannissamut aqqutissiuissusanik, suliniuteqarnissamut atorneqassasoq. Taamaattorli erseqqisarneqassaaq, inuussutissarsiornerup siuarsarneqarnissaa pillugu inatsit aallaavigigaanni, oqaatigineqassaaq matumani inuussutissarsiutit ullumikkut aningaasaqarnermikkut imminnut napatittutut taaneqarsinnaasut pineqanngimmata. Siunnersuut taamaasilluni siunnerfeqarpoq inuiaqatigiinnissaaq aamma siammasinnerusumik isummertoqartariaqartoq pilersaarusiortoqartariaqarlunilu, aammalu nammineq pilersorsinnaanermut annertunerusumik anguniagaqaraanni innuttaasut inuussutissarsiutinik ingerlataqarnermikkut iluanaarnerussammata, suliaqarnani isumagineqarnermut naleqqiullugu. Taamaammat nunalerinermik inuussutissarsiornerup siuarsarneqarnissaanut aningaasaliissutit ajunngitsumik, inuiaqatigiit aningaasaqarniarnerinut, sunniuteqartussatut nalilerneqarput tamatumalu saniatigut Kalaallit Nunaanni nerisassaqaqartitsiniarnermut pilersuinissaaq

pillugu annertuumik Kalaallit Nunaanni ineriartortitsinissamut pilliuteqaqataasinnaalluni.

### *§ 2-mut*

Imm. 1-imut

Oqariaatsit ”nunalerineq” imaluunniit ”nunalerinermik inuussutissarsiuteqarneq” taamaasilluni silinnerusumik isumasiuuserneqarpoq. Taamaammat ersarissarneqarpoq oqaatsit ilaatinneqartussat ingerlatsineq aamma uumasuutininik kinguaassiorititsinerit, orpinnik naatitsineq, naatitanik naatitsineq, uumasuutininut assigiinngitsunut ivikkanik nerukkaatissanik naatitsineq aamma uumasuutigisanit meqqunik, amernik, kukinnik il.il. atuilluaanerit ilanngullugit oqariaatsimut tapiliunneqassasut. Tamatuma saniatigut oqariaatsimut ilaatinneqarput nunalerinermut atatillugu aamma pineqarmata nunalerinermi naatitat tamakkerlugit aamma tunisassiat imaluunniit taakkua ilaannik tunineqartussatut tunisassiatut pilersinneqartut ilanngullugit taasisoqassanerani.

### *§ 3-mut*

Inatsisartut Inatsisaat manna aallaavigalugu, aningaasartuutit landskarsimit akilerneqassapput, taamatuttaaq Inatsisartut Inatsisaannut aningaasaliissutissatut sinaakkusiussat, ukiumoortumik aningaasanut inatsisini amerlassusilerneqartassapput.

Siunnersuummi inuussutissarsiutit siuarsarniarlugit angusaqarniarnermi § 3–mi pilersaarutininut siunnerfiusimasinnaasunut tunngaviusumik piumasaqaatit nassuiarneqarput.

Oqaaseq ”pilersaarut” atorlugu ataatsimoortumik taaguusiisoqarpoq, matumani qinnuteqartup, inuussutissarsiutit siuarsarniarlugit taarsigassarsinissamut qinnuteqaateqarnermini siunertaminut tunngaviusunut atorneqaqqullugu.

Aaliangersakkami piumasaqaatit assigiinngitsut allaqqapput, taakku aallaavigalugit inuussutissarsiutit siuarsarniarlugit taarsigassarsititsinissaq akuerineqassanersoq Naalakkersuisut aaliangilersigatik nassuiarneqartut nassataannik, qinnuteqaatit ataasiakkaat missingerlugit nalilersorneqassapput. Qinnuteqaalli akuerineqassappat taava piumasaqaatit tamaasa naammassineqarsimassapput.

Nr. 1-imut

Teknikikkut illersorsinnaasumik oqarnermi, pikkorissumik nunalerinermik inuussutissarsiuteqarnermi ingerlatsisinnaanermut tunngaviusut pineqarput. Pineqartut inatsisitigut takussutissaqannginerisa atuutsinneqannginnissaasa saniatigut, suliat ataasiakkaat missangiilluni nalilersorlugit isummertoqassaaq.

Nr. 2-mut

Inuussutissarsiutit siuarsarniarlugit taarsigassarsititsinissamut nalilersuutit suliarinerini piumasagaatit assigiinngitsut aallaavigalugit maannamut siunissamullu aningaasatigut attanneqarsinnaanersut nalilernerini amma attartukkat annertussusaat, isertitsissutaasinnaasut aamma akiligassat akilerneqanngitsut akilersuutininut piffissat naliliinerimi ilanngunneqassapput.

Nr. 3-mut

Nr. 3-mi piumasagaatit erseqqissarpaat imm. 2-mi taaneqartutut piumasagaatit ilalersorlugit, pilersaarutinut aningaasartuutit, iluanaarutit isertitassanut naammaginartumik naapertuutissasut. Taamaammat inuussutissarsiutit siuarsarneqarnissaannut taarsigassarsinissamut pilersaaruteqarnermi aningaasalersugassanut, iluanaarutit isertitassat, taarsigassarsinerimi isumaqatigiissutip naammassineqarnissaanut akiliutaasinnaasut piffissap atuuffiani naammannissaat pingaaruteqartorujussuuvoq.

#### *§ 4-mut*

Imm. 1-imut

Nr. 1

Teknikikkut illersorneqarsinnaaneramik oqarnermi, pikkorissumik nunalerinermik inuussutissarsiuteqarnermi ingerlatsisinnaanermut tunngaviusut pineqarput. Pineqartut inatsisitigut takussutissaqannginerisa atuutsinneqannginnissaasa saniatigut, suliat ataasiakkaat missangiilluni nalilersorlugit isummertoqassaaq.

Nr. 2

Tapiissutit taarsersorlugit utertinneqarnissaat siunertaralugu tunniunneqarneq ajorput. Tapiissuteqarnissamut aningaasatigut pisariillisaaneq, pisuni ataasiakkaani tamani inuiaqatigiit aningaasatigut inissimanerannik aallaaveqassaaq. Inuiaqatigiit aningaasatigut inissimanerannik nalilersuinerimi taamaasilluni tapiissutit pineqartut qinnuteqartunut ataasiakkaanut tunniunneqannginneranni inuiaqatigiit aningaasaliissutaannik pitsaanerumik allanut atorneqarsinnaanerannik nalilersuinernek sanilliussilluni ilaqartinneqassapput. Tamatumani nalilersuinerneq ilaatigut ilanngunneqarsinnaapput nunagissaanermut tapiissutit immi inuiaqatigiinnut nunamik piginnittuusunut naleqalersitsisuunerunersut nalilersussallugit.

Pilersaarutit nalilersorneqarnerannut atatillugu piumasagaataavoq pilersaarutip inuiaqatigiit illersorsinnaasaannik naliliinerimi, pilersaarutinut imminnut aningaasatigut napatissinnaanngitsunut taasarialinni aningaasanik tapersiisoqassanngitsoq. Taamaasilluni nalilersuinerneq atatillugu nunaateqarfinni ataasiakkaani aningaasatigut iluaqutissartaata nalinga paasineqareersimassaaq

aamma inuiaqatigiit aqputigalugit tapiissutinik piumasaqaatit ilanngullugit. Taamaasilluni pilersaarutitut tapiissutinik tunniussisoqarsinnaanngilaq siunnersuummi § 12, nr. 4-mi piumasaqaataasut nunagissaanermik sulianut imaluunniit inuussutissarsiutigalugu illuutinik sananermi imaluunniit tigusinermi nunaateqarfiit ataasiakkaat aningaasaqarniarnerannut pitsaasumik kinguneqartitsinnginnera eqquutsinneqanngippat.

Nr. 3

Aningaasanik tapiissuteqarnermi, pilersaarutit iluanni aningaasaqarnermut tunngassutillit nalilersorneqassapput paasiumallugu tapiissuteqarnerup qinnuteqaateqartup imminut ilaqutaminillu, qanoq annertutigisumik pilersuisinnaaneranut nalilersuutitut. Taamaasilluni pilersaarutitut tapiissutinik tunniussisoqannginnerani piumasaqaataavoq, pilersaarut qularutissaanngitsumik qinnuteqartumut tapiissutit atorlugit imminut ilaqtanillu pilersuisinnaanera naammassisinnaassagaa.

#### *§ 5-imut*

§ 5-imi aalajangersakkat pineqartut tassaapput inuussutissarsiorderup siuarsarneqarnissaanut taarsigassarsiniarnermut qinnuteqaateqarnermi uppersaanissamik imaqartoq, tamatumalu saniatigut qinnuteqaatip suliarilinnginnerani Naalakkersuisut nalilersuilerunik sunik tunngavilersuuteqarnissaanik oqariartortumik.

Imm. 1-imut

Nr. 1

Qinnuteqaateqartup suliamut tunngasutigut piginnaasanut uppersaatit tunniutassai piumaneqassapput. Piumasaqaatit assersuutigalugu tassaasinnaapput, nunalerinermik ilinniarsimanermut uppersaatit, Savaatillit Peqatigiit Suleqatigiissunit (SPS)-imiit oqaaseqaat imaluunniit kommunip inuussutissarsiordermut siunnersortaata qinnuteqaateqartup imminut akilersinnaasumik, inuussutissarsiutit siuarsarniarlugit taarsigassarsinissamut qinnuteqaateqarluni suliffeqarfimmik ingerlatsisinnaaneramik uppersaanera.

Qinnuteqaateqartoq piginneqatigiiffiuppat, piginneqatigiiffiup ”suliamut tunngasutigut piginnaasai”, suliffeqarfik aningaasaqarnikkut imminut akilersinnaasumik ingerlatissallugu siulersuisoqartoq imaluunniit atorfilittaartoq ingerlatseqatigiiffimmik aningaasatigut iluanaarfiusumik ingerlatsisinnaasunik uppersarneqassapput.

Nr. 2

Qinnuteqaammut ilanngunneqassapput, ingerlatsinermi akiliisinnaassuseqarnermullu missingersuutit. Missingersuutit takutissavaat, inuussutissarsiutit siuarsarniarlugit taarsigassarsiat qanoq iliorluni utertinneqarsinnaanersut.

Missingersuutini takuneqarsinnaassaaq, iluanaarutit isertitassat suut, kiisalu aningaasartuutissat suut, missingersuutigineqarnersut. Isertitat aningaasartuutillu qanoq ilisukkut tiguneqarlutillu akilerneqassangatinneqarnersut nalunaarsorneqarsimassapput. Ingerlatsinermi akiliisinnaassuseqarnermullu missingersuutit naatsorsuutit ima nassuiarluarsimatigissapput, tamatumani pilersaarutit aningaasaqarniarneri nalilersorneqarsinnaassallutik.

Nr. 3

Inuussutissarsiutit siuarsarniarlugit taarsigassarsianik qinnuteqartup, nammineq inuttut ataatsimut pigisaasa nalillit tamarmik nalunaarsorneqarsimaneri, qinnuteqarnermi ilanngunneqartassasoq siunnersuutigineqarpoq.

Qinnuteqaateqartup inuttut nammineq pigisaasa nalillit tamarmik Naalakkersuisunit misissuataarneqarsinnaaniassammata taamatut aaliangersaanissamik siunniussaartoqarpoq. Tamatuma nassataanik, Naalakkersuisut takusinnaalissavaat, qinnuteqaateqartup, Namminersorlutik Oqartussanit siornatigut tapersiissutigineqartunik taarsigassarsianillu taarsersuinermi piginnaassuseqarnera piumassuseqarneralu qanoq annertutigisimanersoq nalilersorneqarsinnaalissalluni.

Nr. 4

Nr. 4–mi, inuussutissarsiutinik siursaanissamut attartornissamut qinnuteqaateqarnermi, pisortanit oqartussaasunit akuersissutit aatsaat pissarsiarineqarsimappata inuussutissarsiutit siuarsarniarlugit taarsigassarsinissamut aatsaat akuersisoqarsinnaasoq erseqqissarneqarpoq. Tassaasinnaallutik nunaminertamik tunineqarneq imaluunniit kommunimiit sanaartornissamut akuersissummik tunineqarneq.

Nr. 5

Pilersaarutitut piumasaqaatinik allanik oqarnermi pineqartut tassaapput, pilersaarummut pineqartumut atatillugu, inatsisitigut allatigullu piumasaqaatinik naammassinissimanissaq.

Imm. 2-mut

Qinnuteqartup aningaasaateqarneranut atatillugu nalilersuinermi qinnuteqartup qinnuteqaamminik nassiussiviata nalaani aningaasatigut inissisimaffippiaani pissaaq. Qinnuteqaateqarnermi piumasaqaatit allat soorlu sillimmasiinermi suliassamik aaliangiineq imaluunniit eqqartuussivilersuussineq il.il., qinnuteqaatip nalilersornerani pineqartut ilanngullugit nalilersuisoqassanngilaq, pineqartunut suliaq aatsaat naammassippat ilanngunneqassammata. Aaliangersakkami

erseqqissarniarneqarpoq, qinnuteqaateqarnermi pineqartut tassaammata, qinnuteqaateqartup qinnuteqarnerup nalaani aningaasaqarniarneranut tunngassutillit kisimik soqutiginaateqarmata, taamaammallu qularnaatillit nalilersuinerni ilaatinneqaratik.

#### Imm. 3-mut

Qinnuteqaateqartoq, siusinnerusukkut Namminersorlutik Oqartussanit imaluunniit Naamminersornerullutik Oqartussanit inuussutissarsiornermut tunngatillugu taarsigassarsisimappat imaluunniit tapiissutisisimappat, Naalakkersuisut qinnuteqaateqartup siusinnerusukkut taarsigassarsinermini imaluunniit tapiissuteqarfigineqarnermini pisussaaffini naammassisimanerai nalilersorinnaavaat. Naalakkersuisut taamaasillutik qinnuteqaateqartoq siusinnerusukkut Kalaallit Nunaanni Namminersorlutik Oqartussanit imaluunniit Namminersornerullutik Oqartussanit, inuussutissarsiornermut tunngatillugu taarsigassarsisimansoq imaluunniit tapissutisisimansoq paasiumassallugu Naalakkersuisut piumasarisinnaavaat.

#### Imm. 4-mut

Imm. 4–mi siunnersuutigineqarpoq erseqqissaatigineqassasoq, qinnuteqaateqartoq ataaseq, tassa inuk ataaseq imaluunniit piginneqatigiiffik ataaseq, nunaleriffimmut ataatsimut taamaallaat inuussutissarsiutit siuarsarniarlugit taarsigassarsitinneqarsinnaammata. Tamatumunnga pineqartunut aningaasaliissutit killeqarneri peqquutaapput, taavalu siammasissumik suliassaqartitsiniarnermut atatillugu siusinnerusumut naleqqiullugu tapersiisarnerup annertunerunissaa kissaatigineqarmat. Aalajangersagaq taamaallaat inuussutissarsiornerup siuarsarneqarnissaanut taarsigassarsinernut atuuppoq aamma tamatumani allanut atatillugu tapiisoqarsinnaaneranik mattussisuugani.

### *§ 6-imut*

#### Imm. 1-imut

§ 6–imi, siunnersuutigineqarpoq Naalakkersuisut, nutaatut, nunaateqarfimmik pissarsisumut, inuussutissarsiutit siuarsarniarlugit, illuutiniq sanaartornissamut imaluunniit illuutigisamik qimatamik tigusinermut taarsigassarsititsisinnaasut, matumani illuutigisamik qimatamik tigusinermi siusinnerusukkut nunaateqarfimmik piginnittuusimasumut najugaqarfigineqarnissaa siunertaralugu. Siusinnerusumut naleqqiullugu aaliangersagaq nutaajuvoq. Kinguaariit paarlaannerini, piginnittunngortup ilaqutaasa qaninnerit, illuutigisami qimatami najugaqarsinnaanerat matumani eqqarsaatigineqarpoq.

Erseqqissaatigineqarpoq, nunaateqarfimmik tiguisumut, taamaallaat inuussutissarsiutit siuarsarniarlugit, nunaateqarfik ataatsimut isigalugu, illuutiniq

sanaartornermut, illuutigisamik qimatamik tigusinermi, aatsaat pineqartunik piginnittuuppat Naalakkersuisut taarsigassarsititsisinnaammata. Taamatut siunniussaqaqarnermi, nunaateqarnerup illumi pigisami ataatsimi katersuuffeqarnissa siunertarineqarpoq, taamaasilluni pissutsit pissusissamisuunngitsut pinissaat pinaveersaartinneqarpoq, assersuutigalugu illuutigisami qimatami, inuk nunaateqarnermut kiisalu piginnittumut/-nut attuumassuteqanngitsoq najugaqassanngimmat.

Naalakkersuisut, illuutigisamik qimatamik tigusinermi inuussutissarsiutit siuarsarniarlugit taarsigassarsititsisinnaalernerat periuseq nutaajuvoq. Aaliangersakkami siunertarineqarpoq, siornatigut piginnittuusimasut najugaqarfittut inigisaasa, aaliangersakkami aamma ilaatinneqarnissaannut ammaassisoqarnissaa. Illuutigisat qimatat, inuussutissarsiutit siuarsarniarlugit taarsigassarsititsisarneq aqqutigalugu pigilersimasat, inatsit manna malilluguttaaq, inuussutissarsiutit siuarsarniarlugit taarsigassarsilluni piginnittuulersimasumit pigilerneqarnissaat aaliangersakkami matumani anguniarneqarpoq. Aaliangersagaq malillugu, illuutigisaq qimataq imatut paasineqarsinnaavoq, piginnittuusimasup maannamut illu qimatatut atorsimasimasaa.

#### *§ 7-imut*

Matumani siunnersuutigineqarpoq piukkunnaateqartumik qinnuteqaateqarsinnaasumut inuussutissarsiutit siuarsarniarlugit taarsigassarsititsisinnissamut periarfissaqartitsineq, aningaasartuutiviit 15%-iata annertoqqataanik inuussutissarsiutigalugu illuutitut sanatitsinermi, allilerinerni imaluunniit tigusinerni taarsigassarsititsisoqarsinnaasoq. Aalajangersagaq siunnersuutigineqartumi § 15-imut atatinneqarluni isigineqassaaq siunertanut assingitut 75 %-it annertoqqataannut tapersiinertut. Isumaa tassa imaappoq qinnuteqartoq § 7 naapertorlugu inuussutissarsiutit siuarsarniarlugit taarsigassarsinnikut 15 % angullugu aningaasaliiffigineqarsinnaammata, taanna § 15 naapertorlugu tapiissutinik 75 % tikillugit aningaasalersorneqarneranik ataqatigiissinneqarsinnaalluni, taamaasilluni 90 % angullugu nunalerinermik inuussutissarsiorterup siuarsarneqarnissaa pillugu inatsimmi aningaasalersuinissamut periarfissaasunit aningaasalerneqarsinnaalluni.

#### *§ 8-mut*

##### Imm. 1-imut

Aalajangersakkap inatsimmi § 6 naapertorlugu aningaasartuutit suut illumut qimatamut sanaartortitsinermut imaluunniit tigusinermut pilersaarummut tunngatinneqartunut, aamma inatsimmi § 7 naapertorlugu aningaasartuutit suut inuussutissarsiutigalugu illuutitut sanaartortitsinermut, alliliinernut imaluunniit tigusinermut pilersaarummut tunngatinneqartunut erseqqissaavoq. Aningaasartuutit

pineqartut taakkuupput pissarsiarinerani nalinga inuussutissarsiutit siuarsarniarlugit taarsigassarsinissamut qinnuteqaatigineqarsinnaasut.

§ 6 naapertorlugu illu qimatap tigunerani imaluunniit § 7 naapertorlugu inuussutissarsiutigalugu illuutitik tigusaqarnermut atatillugu pissarsiarinerani nalinga tassaavoq pisarinerani nalinga.

§ 6 naapertorlugu illu qimatap sanatinnerani aamma § 7 naapertorlugu inuussutissarsiutigalugu illuutitik sanatitsinermi imaluunniit allilerinnermut atatillugu pissarsiarinerani nalinga tassaavoq illup toqqaviinut sanaartortitsinermi ikiuuttunut akissarsianut aningaasartuutit tamakkerlugit aamma sanaartortitsinnermut atatillugu aningaasartuutit allat ilanngullugit aamma teknikkimut, inatsisilerinnermut aamma aningaasaqarnermut siunnersortinnermut aningaasartuutit.

Teknikkikkut, inatsisitigut aningaasaqarnermilu siunnersorneqarnerit ilanngunneqarput, taamaasilluni qinnuteqaateqartoq, sanaartornermut imaluunniit pisinerup kingorna, pitsaasumik aallarnisaanissaminut toqqammavissaqarniassammat.

Imm. 2-mut

Nunaateqarfiit pioreersut tigunerini, inatsit malillugu pissarsiarinerani nalinganut ilaapput illuutit pisariaqartinneqartut tamarmik, maskiinat, uumasuutit aamma nunalerinnermi atortuusinnaasut tamaasa.

Teknikkikkut, inatsisitigut aningaasaqarnermilu siunnersorneqarnerit ilanngunneqarput, taamaasilluni qinnuteqaateqartoq, sanaartornermut imaluunniit pisinerup kingorna, pitsaasumik aallarnisaanissaminut toqqammavissaqarniassammat.

Imm. 3-mut

Naalackersuisut, sanaartornerni tigusineruilu assingusuni nalinginnaasumik aningaasartuutigineqartartut amerlaqataannik inuussutissarsiutit siuarsarniarlugit taarsigassarsititsisinnaapput.

*§ 9-mut*

Imm. 1, nr. 1 aamma 2

Ingerlatsinnermut atortunut, atortunullu allanut, nunalerinnermik ingerlatsinnermi pisariaqartinneqartunut inuussutissarsiutit siuarsarniarlugit taarsigassarsinissamut qinnuteqaateqartoqarsinnaavoq, tassunga ilanngullugit innaallagissamik pilersuinnermut atortunik. Inuussutissarsiutit siuarsarniarlugit taarsigassarsineq aammattaaq atuuppoq innaallagissiuutini ataavartuusuni mingutsitsisuunngitsullu



pillugit innaallagissiorfeeqqat, anorisaatit, seqerngup qinngorneranit nukissiuutit aamma assigisaat, Kalaallit Nunaata CO2-mik aniatitsineranik apparsaaqataasinnaasutut suliniutitut.

Nr. 3-mut

Umiatsiaaqqamut nammineq inuttut angalanermi atorneqartussamut taammaallat taarsigassarsisoqarsinnaanera erseqqissaatigineqarpoq. Tamatumani taamaammat, inuussutissarsiutigalugu inunnik angallassinissamut taarsigassarsisoqarsinnaanera pineqanngilaq. ATV–nik sisamanik assakaasulinnik, ”motorcykkilinnik” pissarsiniarluni, inuussutissarsiutit siuarsarniarlugit taarsigassarsinissamut qinnuteqarnissaaq, taamaallat aaliangersakkami nr. 1–imi allaqqasut aallaavigalugit pisinnaavoq, tassa imaappoq nunalerinermik ingerlatsinermi atorneqarnissaa siunertarineqarpat, taamaasilluni pinngortitami angallatit illerngi kusanangitsut killilerneqassapput.

### *§ 10-mut*

Uumasuutininut kinguaassiortunut inuussutissarsiutit siuarsarniarlugit taarsigassarsititsisarnerup, malittarisassanut atuuttunut naleqqiullugu, annikillisarneqarnissaa siunnersuutigineqarpoq. Taamaammat taaneqartutigut aalajangersarneqartut inuussutissarsiutit siuarsarniarlugit taarsigassarsititsisoqarsinnaavoq. Siusinnerusukkut naligninnaasumik uumasuutissat tamarmiusut pissarsiarinissaannut taarsigassarsisoqarsinnaagaluarpoq. Tamatumani peqqutaasoq tassaavoq, savaatillit nunaateqarnermillu ingerlataqartut allat, uumasuutaat namminneq kinguaassiortarneri naatsorsuutigineqarmat imaluunniit uumasuutit kinguaassiortussat nunaatilinnit allanik paarlaasseqateqarnermi pissarsiarineqarsimasut uumasuutigisanik namminneq amerlisitseriaasinnaammata.

Nr. 1-imut

Nunaatigisap annertussusaa aallaavigalugu naliliineq apeqqutaassaaq aamma pissarsinermut atatillugu aningaasatigut missangersuutit apeqqutaassapput uumasuutigisat tamakkerlugit immikkuullarissumik amerlisitsinikkut aamma annertuumik amerlisitsinikkut pissanersoq, taamaasilluni aalajangersakkap piumasaaqatai atuutsinneqarlutik.

Nr. 2-mut

Maleruagassami matumani uumasuutininut kinguaassiortitassanik pissarsiniarnermi nunalerinermik inuussutissarsiornerup siuarsarneqarnissaanut taarsigassarsinikkut ammaassisoqarpoq, uumasuutit kinguaassiortitassat annertungaatsiartumik annaaneqarsimatillugit. Maleruagassaaq manna malillugu ikiorserneqassagaanni, taava nammineerluni sunniuteqarfigisinnaangisamik pisoqarsimatillugu ikiorsiisoqarsinnaavoq, nunaateqartup pisumut arlaannaatigulluunniit pinissaanut takorluuisimangiffigisaani imaluunniit nunaateqartup pisumut qanoq iliuseqarfigisinnaangisaanut pisoqartillugu.

Nr. 3-mut

Nr. 3 aallaavigalugu, nutaatut assersuutigalugu savaateqarfimmik pilersitsiniaraanni, uumasuutit kinguaassioortussanik pissarsiniarnermut inuussutissarsiutit siuarsarniarlugit taarsigassarsititsisoqarsinnaangilaq, taamaallaalli nunaateqarfiup suliffeqarfittut aallartisaqqinnerani kisimi pisinnaalluni.

*§ 11-mut*

Naalakkersuisut §§-it 6, 8 aamma § 9 aallaavigalugit, pigisat nalillit iluarsaannerinut inuussutissarsiutit siuarsarniarlugit taarsigassarsititsisinnaapput. Nunaateqarnerup ingerlaqqinnissaanut annertuumik pingaaruteqarnera kiisalu nalinginnaasumik naatsorsuutigineqartumillu iluarsartuussinermi aningaasartuutit amerlanerunissaat matumani piumasaqaatigineqarpoq. Tassa pineqarlutik, iluarsartuussinerit, nutarterinerit allannortiterinerillu, nalinginnaasumik aserfallatsaaliinermut attuumassuteqanngitsut. Tamanna peqquteqarpoq, nalinginnaasumik aserfallatsaaliinerit ingerlatsinermut aningaasartuutinit matussuserneqartassasut naatsorsuutigineqarmat.

Nunaateqarnerup ingerlateqqinnissaanut annertuumik pingaaruteqarnissaanik piumasaqaateqarnermi, pineqartoq tassaavoq, iluarsartuussisoqanngippat nunaateqarnerup ingerlateqqinnissaa nalorninaateqartutut isigineqartoq.

*§ 12-mut*

Aalajangersakkap siunertanut sunut tapiisoqarsinnaanersoq aamma inuussutissarsiutit siuarsarneqarnissaa pillugu inatsimmi qinnuteqartup tapiissutinik pissarsinissaannut piumasaqaatit atuutsinneqartussat imarimavai.

Nr. 1-imut

Kalaallit Nunaanni nunaateqarnermut sulianut atatillugu tapiissutinik pissarsisinnaassagaanni ukioqortussutsit 21-niit ukiunut 65-inut killilerneqarsimapput.

Nr. 2-mut

Nunagissaanermik suliaq imaluunniit inuussutissarsiutigalugu illuutitut sanatitsinerni imaluunniit tigusinernut atatillugu tapiiffigineqarnissamut piumasaqaataavoq, qinnuteqaateqartoq nunalerinermik pioreersumik ingerlatsisuussasoq. Taamaasilluni nunalerinermik ingerlassaqarnialernermut aallartisarnermut tapiissuteqartoqarsinnaangilaq.

Nr. 3-mut

Qinnuteqartup uppersarsassavaa nunagissaanermik suliani imaluunniit inuussutissarsiutitigut illuutigisaq nunalerinermut siuarsaataallunilu pimoorussinerulersitsissutaanersoq. Aalajangersakkap pimoorussamik pitsaasumillu angusaqarfigineqarnissaanut pisariaqarluinnassuseqarneranik tapiissuteqaqqusinermut qinnuteqaammut tunngaviussapput.

Nr. 4-mut

Nunagissaanermik sulianut nunaateqarnerup aningaasaqarniarneranut pitsaasumik kinguneqartitsissaneranut naatsorsuisoqarnissaanut siunertaq, ilaatigut suliap aningaasartuutaaneranik ersarissumik paasinnikkumanermik piumasaqarnermik tunngaveqarpoq. Pilersaarut qinnuteqartup nunaateqarfianut aningaasatigut pitsaasumik pilliuteqarpat, taava piumasaqaat eqquutsinneqassaaq.

### *§ 13-imut*

Imm. 1-imut

Aalisarnermut, piniarnermut, nunalerinermullu Inatsisartut peqqussutaanni atuuttumi § 13 aallaavigalugu, narsaasiormut nammineq aallarniutitut pigeriigassat 30 %-iussapput taavalu 70 %-it erniaqanngitsumik akilersugassaannngitsumillu taarsigassarsiarineqarsinnaallutik. Periuseq taanna allannngortinneqarnissaanik siunnersuutigineqarpoq taakkua tapiissutinngortillugit nunagissaanermut aningaasartuutaasunut matussuserneqartussanngorlugit. Tamanna allaffissornermi suliaat oqilisarniarlugit pissaaq. Tapiissutit ataasiaannartumik tunniunneqartassapput, matumanilu taarsigassarsiat taarsersorlugit utertinnissaannut allaffissornermut nukinnik atuiffiujunnarani.

Imm. 2-mut

Suliarineqartussat annertussusaat apeqqutaatillugu, imm. 1-imi qinnuteqaatinut atatillugu tapiissutit nalilersorneqarneranni, nunaminertap annertussusaa aamma suliap pitsaassusia nalilersuinermi ilaatinneqartassapput.

Imm. 3-mut

Nunagissaanermi sulianut atatillugu nalilersuinerne §§-ini 4 aamma 12-imi piumasaqaatit nalilersuinermilu piumasaqaatit assigiinngitsut allaqqasut malinneqassapput.

Imm. 4-mut

Nunagissaanermi sulianut atatillugu peqquserluttoqannginnissaa siunertaralugu, Nunalerinermik Siunnersuisoqarfiup nunalerinermik suliaq naatsoreerpagu

pitsaanertut isigineqarsimavoq aatsaat naatsorsuisoqareerpat aningaasanit tunniussisoqarnissaa. Taamatut iliuuseqarnikkut qulakkeerneqarniassamat tapiissutit eqqortuussusaannut nalilersuisoqarsimanera.

#### *§ 14-imut*

Nunalerinermut tapersiisarneq pillugu Inatsisartut peqqussutaanni aaliangersaq maannamut atuuttoq assigalugu nammineerluni illulianut tapiisarnermut aalajangersagaqarpoq. Maannamut peqqussutip atuuttup § 9-p periarfissiineranik ingerlatitseqqiineruinnarpoq.

Imm. 2-mut

Aalajangersagaq manna naapertorlugu atortussanut aningaasartuutit uppersaatitallit 95 % - ii qaangerlugit tapiissutinik tunniussisoqarsinnaangilaq.

#### *§ 15-imut*

Imm. 1-imut

Maleruagassap aalajangersarpaa inuussutissarsiutigalugu illuummik sanaartornermut, allilerinermut imaluunniit tigusinermut tapiissuteqarsinnaaneq, Aaliangersagaq manna peqqussummi atuuttumi § 9-mut naapertuuppoq.

Imm. 2-mut

Aaliangersakkami tapiissutit amerlassussa at erseqqaarinnerusumik nassuiarneqarput taammaattorli inuussutissarsiutigalugu illuutinut atortunut aningaasartuut annerpaamik 75 %-iat tikillugu.

#### *§ 16-imut*

Pigisat nalillit §§ 14 aamma 15-imi taaneqartut iluarsaanneqarnerannut Naalakkersuisut tapiissuteqarsinnaapput. Piumasaqaataavoq iluarsaassinerit nunalerinerup ingerlateqqinneqarnissaanut annertuumik pingaaruteqarnerannik aammalu nalinginnaasumik naatsorsuutigisamillu iluarsaassilluni aningaasartuutinit qaffasinnerunissaat. Tamatumani pineqarput iluarsaassinerit, nutarterinerit aamma allangortitsinerit, nalinginnaasumik aserfallatsaaliinerup avataatigut sulianut. Tamanna peqquteqartinneqarpoq nalinginnaasumik aserfallatsaaliinermut aningaasartuutit nalinginnaasumik ingerlatsinermut aningaasartuutinit matussuserneqarnissaat naatsorsuutigineqarmat. Iluarsaassinernut atatillugu nunalerinerup ingerlateqqinneqarnissaannut annertuumik pingaaruteqarneranut

piumasaqaammut atatillugu, isumaa uaniippoq nalilersuisoqartariaqartoq iluarsaassineq pinngippat, nunaateqarnerup ingerlaannarnissaanut innarliissanersoq.

### *§ 17-imut*

Aalisarnermut, piniarnermut nunalerinermullu tapersiisarneq pillugu, Inatsisartut peqqussutaanni maannakkut atuuttumi, taarsigassarsitseriaatsit assigiinngitsut 14-it neqeroorutigineqarput, taarsigassarsiat assigiinngitsut ernialersukkat arfineq marluk aammalu taarsigassarsiat ernialersugaanattillu akilersugassaanngitsut arfineq marluk.

Nunaatilik amerlanertigut annikitsukkaartunik amerlasuunik taarsigassarsiaqartarpoq, inuussutissarsiutinut tapersiisarnermut aaqquissuussinermit taarsigassarsianit, ingerlatsinermut aningaasartuutit annertunersaat aningaasalersorneqartarmata.

Nunaatilik assersuutigalugu assigiinngitsunik 21-nik taarsigassarsiaqarsinnaavoq. Taakkunanga 21-nit arfineq pingasut ”taarsigassarsiatut mikisutut” taaneqarsinnaapput, taarsigassat akiligassaviit minnersaat 1.500 kr.–iusinnaallutik.

Aaliangersakkami nutaami, ”taarsigassarsiatut mikisutut” taaneqartut ingerlatsinermut akiligassarsiatut inissinneqarnissaat eqqarsaatigineqarpoq, taamaasilluni ullumikkumut naleqqiullugu, allaffissorneq pappiliarsornerlu apparsarneqassammata.

Ingerlatsinermi akiitsutigut aningaasaliiffigineqarnerup atuutilernissa siunnersuutigineqarpoq, nerukkaatissanik naatitassanillu pissarsiniarnermi taarsigassarsiat ernialersukkat 100 % tikillugu annertussuseqartarmata. Nerukkaatissanut, naatitassanut, naggorissaatinullu fabrikkini sananeqartunut assigisaannullu taammaallaat ingerlatsinermi akiitsutigut aningaasaliissuteqartoqarsinnaavoq. Taamaattorli atortussanik annertunngitsunik pissarsiniarnermi kiisalu aserfallatsaaliinermit aningaasartuutit amerlanngitsut ingerlatsinermi akiitsutigut aningaasaliiffigineqarsinnaanerit ammaassiffigineqarpoq.

### *Imm. 1-imut*

Nunaateqarnermut sunniuteqartumik aaliangersimasunut, ingerlatsinermit akiligassarsiat atuutsilernissaannut periarfissiisoqarpoq. Nunaateqarnermik ingerlatsinermit attuumassuteqartutigut akiitsutigut aningaasaliiffigineqarneq aqutugalugu, atortussat annertunngitsut pissarsiarineri kiisalu aserfallatsaaliinermit suliat annertunngitsut akilerneqarsinnaapput.

Ingerlatsinermit akiligassarsiat atulersinneqarniarput allaffissorneq oqilisaaffiginarlugu, taamasilluni qinnuteqaateerarpasuit matumani isummerfigineqassanngillat, taakkuli ingerlatsinermi akiitsutigut aningaasaliiffigineqarneq aqutugalugu aningaasaliiffigineqarsinnaallutik.

Aningaaserivimmi taarsigassarsineq/akiliutigeriaannanngorlugit atukkiussat qularnaveequsiisoqannginneranut peqqutaavoq, Naalakkersuisut aningaasat ingerlatsinermut allamulluunniit atorneqarnerinut nakkutiginninnertik annaarusunngimmassuk. Aningaasartuutit akilerneqarnerisa kingorna aningaasanik tunniussisoqassaaq, taamaattoqannginneranili assersuutigalugu akiligassap allagartaa uppersaartit nassiunneqassaaq. Akiligassat akilerneqarnerinut, Naalakkersuisut uppersaammik takusaqarusunnerannut, Naalakkersuisut, pisortat aningaasaliissutaasa ingerlatsinermi nakkutiginnittussaatitaanerat peqqutaavoq, Naalakkersuisut innuttaasunut periarfissiissutaat akiligassarsisitsinermi atuuffissamminnut atorneqarnissaat piumasaqaataammat.

Naalakkersuisut pissusissamisoortumik, pisortanit aningaasaliissutigineqartut, atorfissaminnut atorneqarnerisut uppersassallugu soqutigivaat, tamannalu aaliangersakkami matumani anguniarneqarpoq.

#### Imm. 2-mut

Imm. 1-imi siunertarineqartut taakkartorneqartut saniatigut, immikkut tassanngaannartumik pisoqartillugu ingerlatsinermut akiligassarsiat periarfissaassapput. Atorneqarsinnaaneranut periarfissat tassaallutik, ingerlaannartumik iliuuseqartoqanngippat, annertuumik annasaqarfusinnaasunik pisoqariisaarpaat. Nunaatillip nammineq isorineqarfineqarsinnaanngisaanik pisoqarpat ikiussallugu matumani siunertarineqarpoq. Assersuutigalugu, naatitanik/nerukkaatissanik katersiniarnermi, maskiinat iluarsartuunnissaat pisariaqalerpat.

#### Imm. 3-mut

Peqqussutip akuersissutigineqarneranut atatillugu, ingerlatsinermut akiligassarsiat tunniunneqarsinnaanerinut malittarisassiortoqassasoq ilimagineqarpoq. Tamatuma saniatigut Naalakkersuisut, ingerlatsinermut akiligassarsiat taarsorsorlugit akilersorneqarnissaannut malittarisassiornissaat naatsorsuutigineqarpoq. Aaliangersakkami, Naalakkersuisut ingerlatsinermut akiligassarsiat tunniunneqarnerini aaliangersimasumik erniaqartinnissaannut periarfissaqarnerat taaneqarpoq. Nalunaarummi, ingerlatsinermut akiligassarsiat tunniunneqartarnissaanut toqqammavissanik aaliangersaasoqarsinnaavoq.

### *§ 18-imut*

#### Imm. 1-imut

Peqqussummi maannamut atuuttumut sanilliullugu inuussutissarsiutit siuarsarniarlugit taarsigassarsititsisarnerup, taarsigassarsititseriaatsit atuuttut taarsissavai. Inatsit nutaaq taamaalilluni tamatumuunakkut siulianut sanilliullugu piuminarsaavoq. Inuussutissarsiornerup siuarsarneqarnissaanut

taarsigassarsititsisarneq tunniunneqartassaaq aamma akilersorneqartassaaq aalajangersakkamik ernialersorlugu taarsersugassatut atukkatut.

#### Imm. 2-mut

Inuussutissarsiorderup siuarsarneqarnissaanut taarsigassarsianut akilersuinissamut Naalackersuisut tapiissuteqarsinnaapput, taamaattorli erniat utertillugit akilersornerannut atuutinngilaq.

Aaliangersagaq manna malillugu, assersuutigalugu inuussutissarsiutit siuarsarniarlugit taarsigassarsiat akilersornerini, taarsigassarsisoq 1 krone-mik akiliigaangat, inuussutissarsiutit siuarsarniarlugit taarsigassarsiat 1 kr. 25 urre-mik appartarsapput. Taamaasilluni inuussutissarsiutit siuarsarniarlugit taarsigassarsianik apparsaalluni taarsersuisoq, Naalackersuisuniit 25 urre-nnattassaaq imaluunniit akilersukkami 25 %-iinik tapiiffigineqartassaaq.

#### Imm. 3-mut

Matumani nunalerinermik ingerlatallit ataatsimoorlutik illuutiniq aamma maskiinanik pisisalernerulernissaannut kaammattuutaasinnaasutut nunaateqartut arlallit ataatsimut pissarsinerminnut annertussusikkamik tapiinikkut periarfissaqartitsilerneq ilanngunneqarpoq, taamaasilluni ataatsimoortumik aningaasartuutit appartinneqassapput nunaateqartumullu ataasiakkaanut aningaasartuutikillisaanermik kinguneqassalluni.

#### Imm. 4-mut

Inuussutissarsiutit siuarsarniarlugit taarsigassarsiat utertillugit taarsersornerannut tapiissutit annertussusissaannik, Naalackersuisut inuussutissarsiutiniq pingaernerit iluanni aaliangersimasutigut siuarsaanissamik kissaateqarnerannut naapertuuttumik, Naalackersuisut aaliangersaassapput. Inuussutissarsiutit siuarsarniarlugit taarsigassarsianut ataasiakkaanut tapiissutit taarsersunissamullu piffissaritaasoq aaliangersarneqassapput, piffisarlu taarsersuiffusoq tamaat atuutissallutik.

#### Nr. 5-imut

Taamatut inuussutissarsiuteqalernissaq oqilisarniarlugu, aaliangersakkami, nunaatilinnngorlaamut, inuussutissarsiutit siuarsarniarlugit taarsigassarsititsisarnermi, tapiissutigineqartartut procentii nalinginnaasumit qaffasinnerussapput. Erseqqissaatigineqassaaq procenti aalajangersarneqassammat, taamaammat imm. 4-mi procentimut taaneqartumut atatillugu isigineqassanngimmat. Tamanna peqquteqarpoq Naalackersuisunit siunertarineqanngimmat procenti 75 %-i qaangissagaa, soorlu imm. 4-mi taaneqartutut.

#### Imm. 6-imut

Naalackersuisut erniat annertussusissaannik, inuussutissarsiutit siuarsarniarlugit taarsigassarsiat taarsersorneqarnerini tapiissutissat annertussusissaannik, atugassaritaasutigullu allatigut aaliangersaanissaminnut pisinnaatitaapput. Nalunaarusiornikkut taarsersuinermi tapiissutigineqartussat amerlassusissaat pillugit malittarisassiortoqarsinnaavoq, tamatumunnga atatillugu Naalackersuisut inuussutissarsiutit assigiinngitsut akornanni, inuussutissarsiutillu ataasiakkaat iluini tulleriissaarillutik pingaarnersuisinnaapput.

#### § 19 –imut

#### Imm. 1 aamma 2

Naalackersuisut aaliangerunik inuussutissarsiutit siuarsarniarlugit taarsigassarsititsiniarlutik, qinnuteqaateqartup nammineq, pissarsiarinninnermi nalingata minnerpaamik 10 %-ianik aallaqqaasiinissaa imaluunniit pilersaarummut aningaasartuutissat akuerisat nalingi Naalackersuisut piunasaqaatigissavaat. Inuussutissarsiutit siuarsarniarlugit inatsimmik piunarsaanermut atatillugu inuussutissarsiutit siuarsarniarlugit taarsigassarsititsisarnerit tamarmik 10 %-imik aallaqqaasiiffiussapput. Aalisarnermut, piniarnermut nunalerinermullu tapiissuteqartarnek pillugu Inatsisartut peqqussutaannut maannamut atuuttumut naleqqiullugu annikitsuinnarnik allannguuteqarpoq. Namminerluni illuliaasartut allannguiffigineqarput, maannakkut nammineerluni aallaqqaasiutissaq 10 %-iussaaq, siornatigut 5 %-iulluni.

#### Imm. 3-mut

Aaliangersakkami, nunalerinermik ingerlatallit, namminneq, pigisanit nalilinnit, aningaasanit tigatoraannaanngitsunit, aallaqqaasiutissaminnik akiliisinnaanerannut, aningaasanngorlugu akiliuteqanngikkaluarluni ammaassisoqarnissaa siunnersuutigineqarpoq. Naalackersuisut allaqqaasiutissatut pissarsianit, nutaatut akianit, pigisanik nalilinnik, nalikilliliinermi nalilersuisinnaatitaapput.

#### Imm. 4-mut

Taamatut inuussutissarsiuteqalernissaaq oqilisarniarlugu, nunaatilinnngorlaamut inuussutissarsiutit siuarsarniarlugit taarsigassarsititsisinaanermut periarfissat aaliangersakkami oqilisarniarneqarput, tamatumani nammineq aallaqqaasiutit akiliutissat affaannangortinneqarlutik.

#### Imm. 5-imut



Nunaatilingorlaaq, ukiunut pingasunut atuuttussamik aningaasaliissuteqarnissamut missingersuusiorsimassaaq, nunaatilingorlaallu pissarsiarinninnermi nalingata 5 %-ia, nammineq aallaqqaasiutissatut taarsigassarsiarisinnaavaa, taanna nalinginnaasumik 10 %-iugaluarpoq.

Imm. 6-imut

Naalackersuisut nalunaarusiornermikkut, nammineq aallaqqaasiutissap qaffasinnerunissaa malittarisassiuussinnaavaat. Aallaqqaasiutissap qaffasinnerunissaa eqqartorneqarsinnaavoq, inuussutissarsiutip pineqartup, ima imminut akilersinnaatigisoq, qinnuteqaateqartoq qaffasinnerusumik nammineq aallaqqaasiisinnaasutut, nalilerneqarpat.

### § 20-mut

Imm. 1-imut

Inuussutissarsiutit siuarsarniarlugit taarsigassarsititsisarnermi, piffissaq taarsersuiffissaq sivisunerpaamik ukiunik 25-nik sivisussuseqarsinnaavoq.

Sanaartornermut, tigusinermut, allilerinermut, imaluunniit nunalerinermi illuutunik sananermut, peqqussut maannakkut atuuttoq tunngavigalugu tapersiisarnermi, ukiut taarsersuiffissat 25-upput. Peqqussummut maannakkumut atuuttumut naleqqiullugu allannguuteqartoqanngilaq.

Sanaartornermut, tigusinermut, allilerinermut, nunalerinermilu illuutigisat pitsaangorsaaffiginerinut, piginnittumut, atuisumut, pisortaasumut illumik najugaqarfissamik ataatsimik sanaartornissamut imaluunniit nunaatigisamik tigusinermi illuliornermut imaluunniit illuutigisanik qimatanik tigusinermut, innaallagissap aqutaanik pilersitsinermut, toqqavissap sanaartugassallu allat sananerini, sanasunik ikiorteqarnermut, kiisalu nunalerinermi illuutigisani atugassamik, inaallagissiorfimmik atuinissamut atortussanik pissarsinermi, aammalu teknikikkut, inatsisitigut aningaasaqarnerullu tungaatigut siunnersorneqarnermut, inuussutissarsiutit siuarsarniarlugit taarsigassarsititsisarnermi, taarsersuineq sivisunerpaamik ukiunik 25-nik sivisussuseqarsinnaavoq.

Taamaasilluni ukiunit 25-nit sivikinnerusumik taarsersuinissaq periarfissaavoq.

Maskiinanik, sakkunik, imerterinissamut atortorissaarutininik, ungaluliornissamut kiisalu ingerlatsinermi atortunut allanut pisariaqartunut aammalu umiatsiaaqqamik, nammineq inuttut angallatissamik, pissarsinermut inuussutissarsiutit siuarsarniarlugit taarsigassarsititsisarnermi, piffissaq taarsersuiffissaq sivisunerpaamik ukiunik qulinik sivisussuseqarsinnaavoq. Taamaasilluni ukiunit qulinit sivikinnerusumik taarsersuinissamut aaliangersagaq periarfissaqartitsivoq.

#### Imm. 2-mut

Tapiissutigineqartut taarsersornissaannut, ukiumik ataatsimik marlunnilluunniit kinguartitsisoqarsinnaavoq, taamaasilluni piffissaq taarsersuiffissaq, kinguartitsineq ilanngullugu sivilunerpaamik ukiunik marlunnik sivilussuseqarsinnaavoq. Ingerlatsinermut tunngassutillit kinguartitsinermut peqqutaasinnaapput. Qinnuteqaateqartup uumasuutiminik ataatsimoortumik amerlisaanissani kissaatigippagu, taamaasillunilu ukiumi siullermi savaaqanik ikinnernik toqoraaniarluni aaliangerpat, tamanna kinguartitsinermut peqqutigineqarsinnaavoq.

#### Imm. 3-mut

Inuussutissarsiutit siuarsarniarlugit taarsigassarsititsisarnermi, § 10 aallaavigalugu uumasuutininik kinguaassiortunik pissarsinermut taarsersuineq sivilunerpaamik ukiunik tallimanik sivilinnerusinnaavoq. Taamaasilluni ukiunit tallimanit sivilinnerusumik taarsersuinissamut aalajangersagaq periarfissiivoq.

Peqqussummi atuuttumi piffissaq taarsersuiffusoq amerlanerpaamik ukiunik qulinik sivilussuseqarsinnaavoq.

#### Imm. 4-mut

§§-it 6 aamma 8-mi taaneqartut malillugit, pigisat nalillit iluarsartuunnerinut, inuussutissarsiutit siuarsarniarlugit taarsigassarsititsisarnermi aallaavigisaq siulleq toqqammavigineqassaaq. Taamaamat inuussutissarsiutit siuarsarniarlugit taarsigassarsititsisarnermi, pigisat nalillit iluarsartuunnerinut taarsigassarsiat taarsersornissaannut piffissaq taarsersuiffiusussaataasoq atorineqassaaq. Pigisanut nalilinnut iluarsartuunneqartunut, taarsersuinissami piffissaq sinneruttoq sunnerneqarnavianngilaq.

Innaallagissap aqquataanut iluarsaassinernut ilaasunut inuutissarsiutit siuarsarniarlugit taarsigassarsititsisarnermi taarsigassarsiat taarsersornissaanut piffissaq annerpaamik ukiunut qulinut sivilussusilerneqarpoq, pissutigalugu naatsorsuutigineqarmat iluarsaassinernut aningaasartuutit nutaamik sanaartornernut naleqqiullugu annikinnerussasut. Aalajangersagaq innaallagissamut tunisassiorfinnut atuutinngilaq.

Siornatigumut naleqqiullugu, taarsersuinissamut piffissaq sivilunerpaaq ukiunut qulinut killeqarunnaarpoq. Imatut sukaterisoqarpoq, iluarsartuussinissaq nunaatigisap ingerlateqqinnissaanut annertuumik pisariaqartinneqarpat, nalinginnaasumillu naatsorsuutigineqartumillu iluarsartuussineq annertuumik aningasartuutaasariaqarpoq.

## Imm. 1-imut

Pigisat nalillit, aningaasalersorneqarnissaanut taarsigassarsiaritinneqartut qularnaveeqquserneqarnissaasa isumannaatsuunissaa, aningaaserivimmiit tamatigut piunasaqaatigineqartassaaq.

Inuussutissarsiutit siuarsarniarlugit taarsigassarsititsinermi, Namminersorlutillu Oqartussat kisimik, pissarsinermut aningaasaliissuteqartuuppata, pigisat nalillit taarsigassarsititsiffiusut siullertut qularnaveeqqusiiffigineqarsinnaapput.

Namminersorlutik Oqartussanut, ”isumannaanerpaq” tassaavoq, namminersortut aningaasaliissuteqarnerini, qularnaveeqquteqarfittut pingaannnginnertut inissisimaneq, pingaartumik aningaaserivinnut. Aaliangersakkami, taarsigassarsisup taarsigassarsiaasa ataatsimoortut, sapinngisamik eqaallisaaffigineqarnissaat anguniarneqarpoq, tamatumanili Namminersorlutik Oqartussat aningaasaliissuteqarnerminni annaasaqannginnissaat qulakkeerneqassaaq. Taamaammatt isumaqatigiisummi immikkut allangortitsinerit akuerineqarsinnaapput.

Nunalerinermi illuutigisat ataatsimut qulakkeerinissutaasinnaanngippata, allatigut qulakkeerisoqarnissaa piunasaqaatigineqarsinnaavoq. Qulakkeerinissutaasinnaasoq alla tassaasinnaavoq pigisat nalilik tuniniarneqarnerani atukkap nalingata naleqqatigisaanut.

## Imm. 2-mut

Pigisat nalillit, illuutigisalli ataatsimoortut pinnagit, aaliangersakkamut attuumassuteqarput, tamatumanilu § 21 imm. 1–imi allaqqasut malinneqassallutik. Aaliangersagarli malillugu, pisariaqanngitsutut nalilerneqarpat, qularnaveeqqusiisoqartariaqanngilaq.

Naqissusiinikkut akiitsut pillugit Inatsisartut inatsisaanni § 21–mi allaqqasut aallaavigalugit, nunalerinermi inuussutissarsiuteqarnermi, inuussutissarsiutinik siuarsaanermi akiligassaartoqartillugu, Inatsisartut inatsisaat atuutissaaq.

## § 22-mut

### Imm. 1-imut

Nunalerinermit tapersiisarneq pillugu Inatsisartut peqqussutaanni § 19–imi allannguuteqartoqanngilaq. Inuussutissarsiutit siuarsarniarlugit taarsigassarsititsisarnermi ernialersuineq akilersuinerlu pillugit Naalakkersuisut malittarisassiussapput. Inuussutissarsiutit siuarsarniarlugit taarsigassarsiat naafferarlugit akilersorneqarsinnaapput, suliat ilaasa naammassineri ilutigalugit akiligassap allagartaa takkukkaangat.

#### Imm. 2-mut

Naalackersuisunit malerugassaq manna naapertorlugu inuussutissarsiutit siuarsarniarlugit taarsigassarsiat tamakkerlugit ingerlaannartumik akileqquneqarsinnaapput piffissaagallartillugu akiliuteqartoqannginneranut atatillugu imaluunniit attartortitsinermut piumasaqaatit allat suusupagineqartillugit.

Taarsigassarsiat uterteqqullugit akileqquneqarsinnaapput pisut kingusinnerpaamik ullormi akiliiffissami, erniat imaluunniit akilersukkat akilerneqanngippata, tassa akiligassanngorneranit kingusinnerpaamik ullut 30-t ingerlareerpata. Matumanili apeqqutaassaaq, taarsigassarsisoq, akileeqqusissummik tigusinerup kingorna ullut arfineq marluk qaangiutsinnagit, inuussutissarsiutit siuarsarniarlugit taarsigassarsiarisami erniaanut akilersukkaminullu akiliisimanersoq. Kingusinnerpaamik ulloq akiliiffissaq kingulleq, Naalackersuisut akileeqqusissutaat nassiuuneqariissaaq imaluunniit saqqummiunneqariissaaq, tasanilu erseqqaarissummik takuneqarsinnaassaaq, inuussutissarsiutit siuarsarniarlugit taarsigassarsiat erniaat akilersukkallu, ulloq akileeqqusiffik nalaarlugu akilerneqarsimannippata, taarsigassarsinermilu isumaqatigiissutit sumiginnarneqarsimappata, taarsigassarsiat tamavimmik taarserneqarnissaat piumasaqaatigineqarsinnaammat, tassunga ilanngullugit inatsimmi § 32 imm. 2 aallaavigalugu, taarsigassarsisoq atukkamigut aalajaalluni ilisimatitsinngippat aamma taamatut pisoqarsinnaavoq.

#### Imm. 3-mut

Aaliangersakkami imm 3-mi piffissakkaartumik akilersuinerup pissusissamisoortumik atuunnissaa aaliangersarneqarpoq. Piffissakkaartumik akilersukkap, piffissaq eqqqorlugu akilerneqarnissaa tassaavoq, ullormit akiliiffissamit ullut 30-it qaangiutsinnagit. Taamatut piffissakkaartumik akiliisoqannginnera pippat taava akileqqusiffimmiit ulluliunneqartumit ullut arfineq marluk qaangiuppata, inuussutissarsiutit siuarsarniarlugit taarsigassarsiat tamakkerlugit akiligassanngussapput.

#### Imm. 4-mut

Aaliangersagaq malillugu, Naalackersuisut piffissakkaartumik akilersuinerup kinguartinneqarneranit nalunaaruteqarsinnaapput. Kinguartitsisoqarnerani, suusupaginnittoqarnera peqqutaanngilaq, matumanimi Naalackersuisunit, inuussutissarsiutit siuarsarniarlugit taarsigassarsititsinermi, taarsersuinissap allannguuteqarnera isumaqatigiissutigineqareermat. Sivisunerpaamik ukiut marluk tikillugit kinguartitsisoqarsinnaavoq.

Piffissakkaartumik taarsersukkat kinguartinneqarnissaanni piumasaqaatigineqartoq tassaavoq, inuussutissarsiutinik siursaanermi taarsigassarsiat tamakkiisumik amerlassusaasa 60 %-iat qaangerlugu qulakkeersimanissaat, taamatuttaarlu akiliisinnaannginneq ataavartussaannigutsut Naalackersuisunit nalilerneqarpat.

”Ataavartussaangitsutut” oqarnermi pineqarpoq, piffissakkaartumik akilersuineri akiliiffisaq siullesq, taamatutaaq ukiunit marlunnit sivilunerusinnaangilaq.

#### Imm. 5-imut

Naalackersuisut piffissami aaliangersimasumi piffissakkaartumik akilersukkat kinguartinneqassasut akuerippassuk imm. 4 aallaavigalugu, inuussutissarsiutit siuarsarniarlugit taarsigassarsianik piffissaq taarsersuiffissaq, taarsersuineq aallarteqqippat, taamatut sivilutigisumik sivilsorineqassaaq. Taarsigassarsisoq piffissakkaartumik akiligassaminik ataatsimik kinguartitsinissaminut akuerineqarsimappat, piffissaq taarsersuiffissaq sinneruttoq, piffissakkaartumik taarsersuiffimmik ataatsimik sivilsorineqassaaq.

#### Imm. 6-imut

Naalackersuisut immikkuullarissumik aatsaat pisoqartillugu, ukiunit marlunnit sivilunerusumik piffissakkaartumik akiligassanik kinguartitsinnaapput. Immikkuullarissumik pisoqarneranik oqarnermi pineqartut tassaapput, silap pissusaa peqqutaappat kiisalu inuussutissarsiordermi qaqutigooortumik aporfeqartoqarpat. Assersuutit taaneqartut itisilerneqarpallaangillat.

Aaliangersakkamik atuiffiusinnaasut tassaapput, qulaani taaneqareersutut pissutsit atuuppata aammalu nalinginnaasumik pissutsinut attuumassuteqartumik immikkuullarissumik pisoqarpat. ”Nappaammik” oqarnermi, pineqartoq tassaavoq, taarsigassarsisup inuussutissarsiutiminik ingerlatsisinnaaneranut sunniuteqartumik sivilusumik napparsimasoqarpat.

Kinguartitsinissamut periarfissiinnermut peqqutaasoq tassaavoq, ataavartuunngikkaluamik akiliisinnaajunnaartoqartarmat. Taarsigassarsisoq ukiut marluk qaangiunnerini, pisunilu immikkuullarissuni ukiut marluk qaangerlugit sivilussusilimmik akilersuisinnaangippat, isumaqatigiissutit malillugit inuussutissarsiutitut siuarsaanissamut taarsigassarsisoq, maannakkut kingornagullu taarsiisinnaangitsutut nalilerneqassaaq, taamaasilluni inuussutissarsiutit siuarsarniarlugit taarsigassarsineq atorunnaartutut nalunaarutigineqassaaq, qularnaveeqqutaasinnaasullu tiguneqassallutik.

### § 23-mut

Naalackersuisut tapiissutinik utertitseqqusisinnaatitaapput, aaliangersakkamili taakkartorneqartutigut, pinngitsooratik taamaaliornissamut pissusaaffeqanngillat.

#### Nr. 1-imut

Tapiissutit utertinneqarsinnaaneri pillugit nassuiarluakkanik najoqqutassiortoqarnissaa siunnersuutigineqarpoq, atornerluinissamut

pinaveersaartitsineq tamatumunnga pequtaavoq. Ukiut malittut marluk ingerlanerini, tapiissutininik pissarsisoq, nunalerinermik inuussutissarsiuteqartutut ingerlaqqissinnaajunnaarpat, imm. 1–imi taaneqartut akiitsunngortunut akileeqqusinerit atuussinnaapput. Tamatuma saniatigut, qinnuteqaateqartoq allamik suliffittaarsimappat imaluunniit ilinniartunngorsimappat immikkuullarissumik pisoqarnera isiginiarneqassaaq. Taamatut pisoqarnerini, sakkukinnerusumik nalilersuinissaq pisariaqassaaq, qinnuteqaateqartoq nunalerinermik inuussutissarsiuteqarnermut pituttorsimassanngippat.

Nr. 2-mut

Naalackersuisut nammineerluni illuliornermut imaluunniit tigusinermut tapiissutininik utertitseqqusinissamik piunasaqaateqarsinnaapput, tapiissutininik pissarsinermiit ukiut qulit qaangiutsinnagit taarsigassarsisup illu tunippagu. Inatsisissatut siunnersuut aqqutigalugu, Naalackersuisut assigiinngitsunik tapiissuteqartarnerini, assersuutigalugu nammineerluni illuliaasartunut tapiissuteqartarnerup atonerlunneqannginnissaa qulakkeerniarneqarpoq, assersuutigalugu nammineerluni illuliamut tapiissuteqarnerup kingorna, tapiissutit tunniunneqarsimatsiaannartut, tuniniaanerme atugassaritaasunit appasinnerusumik akilerlugu tuniniaasoqarnissaa pinaveersaartinneqarpoq. Sivisuumik piffissaqartitsinerme, qinnuteqaatit pimoorussisut qulakkeernissaat Inatsisissatut siunnersuummi anguniarneqarput. Tapiissutininik tigusereernerup kingorna tamanna anguniarlugu nammineerluni illuliaq ukiut qulit iluanni tunineqarsinnaanngilaq, Naalackersuisut akuersisimatinnagit, tapiissutit utertinneqaqqullugit peqqussummik pinngitsoorumagaanni.

Nr. 3-mut

Aaliangersakkami erserpoq pisortanit akuersisutininik pissarsisimannginneq tapiissutininik utertitseqqusinermik kinguneqarsinnaasoq. Assersuutigalugu tapiissutininik pissarsisimasup uumasunik paarsilluarnissaq pillugu, Inatsisartut inatsisaat aallaavigalugu, sutigut tamatigut uumasunik attuumassuteqarnissamut inerteqquteqarfigneqarpat, tapiissutit utertinneqarnissaat piunasaqaatigineqarsinnaasoq.

Nr. 4-mut

Tapiissuteqartarnerme Naalackersuisut atugassaritaasutut aaliangersagai sumiginarneqarpata, tapiissutit utertinneqarnissaannik Naalackersuisut piunasaqaateqarsinnaapput, Naalackersuisut tapiissuteqarnerme toqqammavigisaat eqqunngippata imaluunniit qinnuteqaateqartumit, piunasaqaatit imaluunniit atugassarititaasut taaneqartut naammassineqanngippata taamatuttaaq pisoqarsinnaavoq.

§ 24-mut

Imm. 1 aamma 2-mut

Aaliangersakkap kinguneranik, tapiissutit utertillugit akilersornissaanut atatillugu naatsorsuinermi ukiut 33-t ingerlanerini, ukiumut 1/33-imik apparsarneqarsinnaapput, tapiissutit tiguneraniit naatsorsorneqartumik.

Tulliuttumi assersuut tapiissutit utertillugit akilersornissaanut atatillugu piunasaqaatissat ersarissassavaat:

Tapiissutit 30. juni 2009-mi tunniunneqarput.

11. januar 2014-imi, utertitseqqusilluni piunasaqaateqartoqarnerani, utertitassatut tigujumaneqartut naatsorsornerini angusaq tassaavoq 6/33, taannalu tapiissutigineqareersunit amerlisarneqassaaq.

Ukiumik aallartittumik oqarnermi, ukioq ilivitsoq pineqarpoq. Tapiissutininik tigusinermik oqarnermi, ulloq tapiissutininik tunniussiffiusoq pineqarpoq.

#### *§ 25-mut*

Aalajangersagaq una naapertorlugu inuussutissarsiornermik illuutigisaq imaluunniit nammineerluni illuliaq, arlaatigut tunisisoqaqqusaanngilaq. Tamannali pisinnaavoq tunisineq Naalakkersuisunut saqummiunneqareerpat akuerineqarlunilu.

Imm. 2-mut

Tapiissutininik pissarsisoq toquppat, qimataasut tapiissutininik pissarsisup pisinnaatitaaffinik pisussaaffinillu tiguisinnaatitaapput.

#### *§ 26-mut*

Tapiissutininik pissarsisup kissaateqarneratigut, illutigisamik imaluunniit illumik najugaqarfigisamik, illup tamakkiisumik appaarsaaffigineqarnerata naammassinissaata tungaanut Naalakkersuisut tigusinissaminnut pisussaataitaapput.

#### *§ 27-mut*

Inuussutissarsiornermik illuutininik sananermut, imaluunniit tigusinermut imaluunniit nammineerluni illuliassamik sananermi, piginnittumut, atuisumut, pisortamut imaluunniit ikiortimut ataasiaannarluni tapiissuteqartoqarsinnaavoq, matumani tapiissuteqarnissamut aningaasaliissutit killeqarmata.

#### *§ 28-mut*

Imm. 1-imut

Aaliangersagaq Aalisarnermut, piniarnermut, nunalerinermullu tapersiisarneq pillugu Inatsisartut peqqussutaanni atuuttumi, § 27 nr. 10, 12. november 2001–imeersumik piuinarsaaneruvoq. Malittarisassat atuuttut malillugit, taarsigassarsianik ernialersuinerup unitsinneqarnera, qularnaveeqqutip inissisimaneranut attuumassuteqarpoq. Aaliangersagassatut siunnersuutigineqartoq nutaaq aallaavigalugu, piffissaq taarsigassarsianik atorunnaarsitsiffik Naalakkersuisut tungaanniit aalajangiisuvoq. Atorunnaarsitsinermi Naalakkersuisut qularnaveeqqutininik, naleqarpata tiguisussaanerat tamatumani pineqarpoq.

Taarsigassarsisoq, inatsisit aallaavigalugit, inuussutissarsiutit siuarsarniarlugit taarsigassarsiami apparsarneqarnissaanut tapiissutinik pinngitsorani pisinnaatitaaanngilaq. Tamanna ilanngunneqarpoq atornerluinissaq pinaveersaartinniarlugu. Pissutsilli piviusut takutippaat, taarsigassarsiat sumiginnagaasut taarsipallannissaat anguniarlugu Naalakkersuisut tapiissuteqartarsimasut. Periuutsip taassuma allanngortinneqarnissaa siunniunneqanngilaq, atornerluinissamulli periarfissat pinaveersarsimatinneqarput.

Imm. 2-mut

Taartissat apparsarnissaannut ukiumoortumik tapiissuteqartarneq pillugu aalajangersagaq, peqqussummik atuuttumik ingerlatitseqqiineruvoq.

Ukiumoortumik tapiissutit, taarsigassarsisullu ukiumoortumik akiligassai, qaammatit aqqaneq marluk qanngiutereersut aallaavigalugit naatsorsorneqartarput. Naalakkersuisut inuussutissarsiutit siuarsarniarlugit taarsigassarsianik ullormit atorunnaarsitsiffiannit qaammatit aqqaneq marluk naatsorsorneqassapput.

Aaliangersagaq imatut paasineqassaaq, inuussutissarsiutit siuarsarniarlugit taarsigassarsiat atorunnaarsinneqarnerisa ullulerneqarnerata kingorna, taarsigassarsisup akilersugaasa amerlaqataanik Naalakkersuisut tapiissuteqartassapput.

Taarsersugassat sumiginnaarneqarnissaasa kajuminnartuunnginnissaa, aaliangersakkap suliarineqarnerani eqqarsaatigineqarpoq, taamaasillunilu inuussutissarsiutit siuarsarniarlugit taarsigassarsiat taarsersorneqarnissaanni atugassarititaasut, sumiginnaanikkut iluanaarnarnerunissaat anguniarneqarani. Periuseq maannamut atuuttoq malillugu, pigisat nalillit taarsigassarsissutaasut, taamatuttaarlu isertitaqarnissamut toqqammavigisaq sumiginnaanermi annaaneqartussaammata, taamaammat sumiginnaaneq kajuminnartutut isigineqarsinnaanngilaq.

§ 29-mut

Imm. 1-imut



Isumaakkerinninnissamut periarfissat annertunerusumik maannamut peqqussummut atuuttumut sanilliullugu allanguuteqarnissaat siunnersuutigineqanngilaq. Ukiut angusat imaluunniit utoqqalinersiaqalernerq pissutigalugu, isumakkerinninnissamut periarfissat ingerlateqqinneqarnissaat siunnersuutigineqanngilaq. Inuussutissarsiutinut tapersiisarnermi aningaasaliissutigineqartartunik atornerluinissamut tunngaviliisuusinnaanera matumani pequtigineqarpoq. Nunalerinermik ingerlatallip, 65-inik ukioqalereersup, malittarisassat atuuttut malillugit, savaateqarfiutini assersuutigalugu ilaquttami ilaannut akikitsunngorlugu tunisinnaavaa, matumani akiitsumi sinnerisa isumakkeerinnissutigineqarnissaat naatsorsuutigisinnaagamiuk. Taamatulli pisoqannginnerani, malittarisassat atuuttut malillugit, Naalakkersuisut qularnaveeqqusiisutut tunisinermi akigititaasumik akuerseqqaartussaapput.

Taarsigassarsisoq amerlasuunik akiitsoqarpat, aaliangersakkami matumani malittarisassat malillugit, isumakkerinniffigineqarsinnaavoq. Siunnersuummi § 28 aallaavigalugu, atorunnaarsitsinermi ernialersuineq unitsinneqartarpoq.

Imm. 2-mut

Ukiunik qaninnernik oqarnermi, pineqartut tassaapput ukiut marluk pingasut.

Taarsigassarsisup, ukiuni qaninnerni, inuussutissarsiutinik siuarsaanermi taarsigassarsiaminik taarsersuinissamut periarfissaqarnera tunngavigalugu, imm. 3-mi allaqqasut aallaavigalugit nalilersuisoqassaaq.

Imm. 3-mut

Taarsigassarsisup akilersuinissamut periarfissaqarnera nalilersorniarlugu, taarsigassat amerlassusaat, taarsigassarsisup inoqutaasalu pisuussutaat, matumani ilaallutik katersat, akiitsullu, saniatigut pigisat aammalu taarsigassarsisup pigisai nalillit, nalilersuiffineqassapput. Nalilersuineq pissaaq, taarsigassarsisup ilinniagaa, allatullu suliaasaqarnerup tungaatigut periarfissai aallaavigalugit, taarsigassarsisoq, taartissaminik akilersuinissaminut isertitaqarsinnaassanersoq nalilersorneqassalluni. Taarsigassarsisup ukiui aallaavigalugit, siunissami suliaasaqarnermut periarfissaqarnera nalilersuinermi ilanngunneqarsinnaavoq.

Imm. 4-mut

Aaliangersagaq imatut paasineqassaaq, taarsigassarsisoq sapinngisaminik taarsersuisimmappat, ukiut qulit qaangiunnerini akiitsuminik tamakkiisumik isumakkeerfigineqarsinnaasoq. Tamatumunnga, taarsersuisup taarsersukkaminik akilersuiinnarnissaata pissusissamisoortutut isigineqannginnera tunngavigineqassaaq. Taamaaliornissamut nalilersuinermi aallaavigineqassaaq, taarsersuisup akilersuineri inuttaanut qanoq oqimaatsiginersoq.

Imm. 5-imut

Inuit kisimik, piginneqatigiiffiit pinnagit Naalakkersuisunut akiitsuminnik isumakkeerfigineqarsinnaapput.

*§ 30-mut*

Inuussutissarsiutit siuarsarniarlugit taarsigassarsiat, siusinnerusukkullu taarsigassarsiat pillugit isumaqatigiissutip allangortinnissaanut aaliangersagaq periarfissiivoq. Matumanili piumasaqaatigineqarpoq, inuussutissarsiutit siuarsarniarlugit taarsigassarsiat ukiut tallimat sinnerlugit atuutereersimanissaat, tassami inuussutissarsiutit siuarsarniarlugit taarsigassarsiat, Aalisarnermut, piniarnermut nunalerinermullu tapersiisarneq pillugu Inatsisartut peqqussutaat kiisalu Inatsisissatut siunnersuut manna malillugu, tarsigassarsiat ajornartorsiutitaqanngitsumik ikinnerpaamik ukiuni tallimani taarsersorneqarsinnaammata.

Siusinnerusukkut malittarisassat atuuttut malillugit erseqqissarneqarpoq, inuussutissarsiutit siuarsarniarlugit taarsigassarsiat isumaqatigiissut malillugu taarsersorneqarnissaasa ilimanaateqarnerat ilaatinneqassasoq.

Inuussutissarsiutit siuarsarniarlugit taarsigassarsinermi isumaqatigiissutip allangortinneqarnerani, pigisani nalilinnik qularnaveeqqusiineq annaaneqassanngilaq.

*§ 31-mut*

Inuussutissarsiutit siuarsarniarlugit taarsigassarsianut atuuttunut, akiligassanik nikisitsineq pisinnaavoq, nutaatut taarsigassarsialik, inuussutissarsiutit siuarsarniarlugit tapiissutinik pissarsinissamut piumasaqaatinik naammassinnippat.

Akiligassallit nikinnerat pillugu nalinginnaasumik obligationinut inatsisitigut malittarisassat nassataannik aaliangersagaq matumani taamaallaat aaliangersaavoq. Tassa imaappoq, isumaqatigiissutit nassataannik, akiitsortoq nutaaq pisinnaatitaaffinnik pisussaaffinnillu tigusissaaq. Naalakkersuisut isumaqataappata, isumaqatigiissut aatsaat allangortinneqarsinnaavoq.

*§ 32-mut*

Imm. 1-imut

§ 22 imm. 2 aallaavigalugu, Naalakkersuisut aaliangersinnaapput, inuussutissarsiutit siuarsarniarlugit taarsigassarsitsineq atorunnaarsinneqassanersoq, tassa taarsigassarsiat tunniunneqartut, imaluunniit tapiissutit paasissutissat eqqunngitsut

tunngavigalugit tunniunneqarsimappata. Inuussutissarsiutit siuarsarniarlugit taarsigassarsititsineq atorunnaarsinneqassappat, inuussutissarsiutit siuarsarniarlugit taarsigassarsiat ingerlaannartumik utertinneqassapput.

§ 22 imm. 2–mut innersuussuteqarnermi aaliangersarneqarpoq, Naalakkersuisut taarsigassarsianik atorunnaarsitsineranni, nalinginnaasumik obligationinut inatsisitigut malittarisassat matumani malinneqassasut.

Pisortanut akiligassat kinguaattoorutit akilerneqarnissaannut pinngitsoortitsiniarnerlu pillugit Inatsisartut Inatsisaat malillugu, nunalerinermi inuussutissarsiutinik siuarsaanermi Inatsisartut inatsisaat aallaavigalugu pisassarilerneqarsimasut tiguniarneqarneri pissapput.

Naalakkersuisut naliliigunik paasissutissat eqqunngitsut tunniunneqarsimasut, Naalakkersuisut misissortariaqassavaat paasissutissat eqqortuunersut.

Imm. 2-mut

Inuit piginneqatigiiffiilluunniit, inuussutissarsiutit siuarsarniarlugit taarsigassarsianik tapiissutinilluunniit pisartut, aningaasatigut atukkatik pillugit Naalakkersuisunut paasissutissiisussaataapput. Paasissutissiisussaataanerme pineqartut tassatuaapput, Naalakkersuisut ilisimariigaat allannguuteqarsimappata paasissutissiisutissat.

Annertuumik allannguuteqartoqarneranik oqarnermi, pineqartut tassaapput inuussutissarsiutit siuarsarniarlugit taarsigassarsiat taarsersornerini allannguutit taarsersuinissamut periarfissanut sunniuteqarsinnaasut. Naalakkersuisut taarsigassarsisumut, taarsigassarsianut imaluunniit tapiissutinut tunniunneqartunut sunniutaasut pillugit uppersaatinik nassiussinissaa piumasaqaatigisinnaavaat.

Aningaasaqarnermut tunngasutigut oqarnermi, pineqartut tassaapput, inuussutissarsiormi imaluunniit suliffeqarnermi atugassaritaasut, assersuutigalugu inuussutissarsiummik ingerlatsiunnaarnej, napparsimaneq, piginneqatigiiffinnullu tunngatillugu assersuutigalugu piginnittup allanngornera.

Pisortanut akiligassat kinguaattoorutit akilerneqarnissaannut pinngitsoortitsiniarnerlu pillugit Inatsisartut Inatsisaat malillugu, pisortanut akiitsunik, akilersuisoqassappat, akilersuinissaq ingerlanneqassaaq.

§ 33-mut

Siunnersuutigineqarpoq Naalakkersuisut suli inatsisip sinaakkusiussap iluani malittarisassiornissaminnut annertuumik piginnaatinneqassasut, tamanna eqaallisaanissamik kissaateqarnermik tunngaveqarpoq. Taamaasillutik Naalakkersuisut, qanoq ilisukkulluunniit, pingaarnertut inuussutissarsiutaasunut tunngatillugu, Naalakkersuisut piorsaanermik pilertortumik ingerlatsinissaq kissaatigigunikkum imaluunniit unitsinniarunikku malittarisassiorsinnaallutik.

#### Nr. 1-imut

Naalackersuisut inuussutissarsiormi aalajangersimasutigut nunalerinermi inuussutissarsiornikkut siuarsaanissamik kissaateqarunik imaluunniit pilersaarutit immikkuullarissut pineqarpata, nalunaarusiornikkut taamatut iliuuseqarsinnaapput.

#### Nr. 2-mut

Naalackersuisut inuussutissarsiormi politikikkut iliuusissanik siuarsaanissaq kissaatigigunikku, soorlu nunami immikkoortukkaartumik piorsaaneq, tassaagaluarpata pissutsit aaliangersimasut piorsarneqarnerunissaat imaluunniit inatsit manna aallaavigalugu, inuussutissarsiutit siuarsarniarlugit taarsigassarsisitsisarnerup tapiissuteqartarnerullu iluani aaliangersimasutigut killilersuiniarunik, tamanna nalunaarusiornikkut suliarineqarsinnaavoq.

#### Nr. 3-mut

Naalackersuisut inuussutissarsiutit siuarsarniarlugit taarsigassarsianik taarsersuinermit tapiissuteqartarneq pillugu aaliangersaasinnaapput, matumani ilaallutik tapiissutit amerlassusaat taamatuttaarlu tapiissutinik pissarsissagaanni suut naammassineqassanersut pillugit aaliangersaasinnaallutik.

#### Nr. 4-mut

Naalackersuisut qinnuteqaateqartup ilinniagaqarneranut piumasaqaatit pillugit malittarisassiorsinnaapput. Pilersaarutit pineqartut naammassineqarnissaat anguniarlugu pisariaqarpata, aningaasaqarnermut teknikkimullu tunngasutigut piumasaqaateqartoqarsinnaavoq.

#### Nr. 5-imut

Naalackersuisut nunagissaanermut aammalu inuussutissarsiormik illuutinik sananermut tapiissutit amerlassusaat pillugit malittarisassanik aaliangersaasinnaapput, matumani ilaallutik nunalerinermik ingerlataqartup, nunagissaanermut nammineq sulinermigut pilliutai, maskiinanik atuinermigut il.il., matumani, sulinermik pilliuteqarneq, maskiinanik atuinermik allatigullu atuneq qanoq nalilersorneqassanersoq isummerfigineqassalluni. Taamatuttaaq Naalackersuisut nunaminertat qanoq angitigissanersut, suliap suunera, nunaminertallu qanoq ittuunera, assersuutigalugu ujaraqarnera naggorissusaalu pillugit piumasaqaatinik aaliangersaasinnaapput.

#### Nr. 6-imut

Ingerlatsinermi akiitsutigut aningaasaliiffigineqarnerup ernialersorneqarnera, ingerlatsinermi akiitsutigut aningaasaliissutit amerlassusissaat, ingerlatsinermut akiligassarsiat taarsersorneqartarneri, ingerlatsinermut akiligassarsianut atasumik aningaasartuutit, ingerlatsinermut akiligassarsiat pissarsiarissagaanni uppersaartit pisariaqartinneqartut pillugit Naalackersuisut malittarisassiorsinnaapput.

Nr. 7-imut

Naalackersuisut inatsit manna pillugu malinninnissaq pillugu, allaffissornikkut kommuunit peqataanissaannik piumasagaateqarneq pillugu malittarisassiorsinnaapput. Taamatuttaaq SPS-imut aamma Nunalerinermik Siunnersuisoqarfimmut piumasagaatit assinginik malittarisassiorsinnaapput.

*§ 34-mut*

Siunnersuutigineqarpoq Inatsisartut inatsisaat manna 1. januar 2010 atuutilissasoq.

Inatsisip atuutilerani Aalisarnermut, piniarnermut nunalerinermullu tapersiisarneq pillugu Inatsisartut peqqussutaat nr. 10, 12. november 2001–imeersoq kiisalu Inatsisartut peqqussutaat nr. 11, 2. november 2006-imeersoq atorunnaarsinneqarput.

Inuussutissarsiutinut tapersiisarneq pillugu Namminersornerullutik Oqartussat nalunaarut nr. 12, 12. december 1984–imeersoq, taarserneqarnissami tungaanut imaluunniit inatsit manna peqqussutillu allat, malittarisassiornikkut periarfissiisutaat aallavigalugu atorunnaarsinneqarnissami tungaanut, sulii atuuppoq.

Inuussutissarsiutinut tapersiisarneq pillugu Inatsisartut peqqussutaat nr. 4, 20. november 1984-imeersoq aamma Aalisarnermut, piniarnermut nunalerinermullu Inatsisartut peqqussutaat nr. 10, 12. november 2001–imeersoq kiisalu Aalisarnermut, piniarnermut nunalerinermullu tapersiisarnerup allannguuteqarnera pillugu Inatsisartut peqqussutaat nr. 11, 20. november 2006–imeersoq naapertorlugu piumasagaatit, malittarisassat atuuttut malillugit sulii inatsit taaneqartoq malillugu aqunneqassaaq.